

求恕齋  
叢書

雪橋詩話

五

I20  
44



雪橋詩話卷第五

遼陽楊鍾義撰集

吳興劉承幹參校

宛平鍾勵暇晚雍正六年進士當得知縣以親老不就  
選乾隆三年薦充三禮纂修主周官補國子監助教遷  
禮部主客司主事進祠祭司員外郎與雷貫一黃靜山  
傅謹齋陳體齋同志六七月訂數會會必課所學各  
舉所見辨難究詰衷于一是子光豫知松江府累擢蘇  
松大道就養江南三十七年卒年七十九王惕甫爲撰  
事狀稱其學以窮經爲主究極於天地民物之故而反

求於身心敦飭於倫紀發其餘以爲文章則又不苟爲  
毀譽故謹於撰著又重之以軼失爲具錄其文三篇朱  
竹君觀鍾蔗經先生遺像詩云乾隆十年初稱第一流  
彥吾師鍾勵暇南北所冠弁我年十八九側耳想識面  
嶷嶷文勤公首薦三禮選初試國子師郎官儀曹轉文  
勤典宗伯得屬喜而忭曰吾鍾君賢布被不慙軀塊圯  
宣武街閉戶曲臺撰客或闕其齋不曾手舍卷聞過陳  
詹事憫忠寺角旋國朝有掌故口瀉急渦漩我輒從杖  
履臘過陪春膳齒讓客益溫鄉人慕不憚一朝引年去  
子舍養就簞吳會麗佳哉款款故鄉戀天京幾紛華秀

貌俗腸煽鄉先生行矣渠槩愁改佃昨辛卯仲冬我役  
江波濺旣稅金陵阿上上攝一綫彎環最高峰圭笏臨  
江搢還當謁偉人令子職賓饑直入黃堂寢台背坐老  
籤先生聞我來倒屣領微顛握手忽忘年明燈酌鬯獻  
日子鄉之傑吾老快子瞻相勉古學者山水共攀援太  
守聽無聲余曰先生倦良游雖欲之不敢前請瑗再拜  
辭去去翠螺堆皺絹一日三仰山相思布使院忽蒙長  
者札雙鯉魚躍泉下言歲零落別子百繾綣上言慰子  
問舊聞夙所擅同鄉諸老宿人物志寫繕孫王兩家書  
厥功能鳩僦請陳其大者可傳疇作傳康熙文靖相尙

主子未譴疏寒吳賊膽天鉞利用剽亦有高大理廷對  
陳情便願身代父戍誠感疾馳券此忠一孝一大勇色  
不變子其載筆書光燄長燧燧我識先生約耆舊傳必  
踐歸來書未草梁木駭折箭循環札在篋老成言孔僎  
亡何遺像來落我涕潛潛側聞先生手經穴禮互穿噫  
嘻鄭君注賈孔其屬眷漢唐學法壤訛冠等鞵綫開成  
石雖存注疏刊未徧昔聖徵器物在殷路周覓下士浪  
鑿空剗削古坵墀陳敷累妄庸醫藥成疰癘遂來句讀  
師大放小則衷先生本修身所得頗博衍遺編惜未出  
圖之名可揣蔗經喻食蔗操末本必連漸入境乃佳低

聲哦若嘔吐詞與舉足非此戲猥狎交通旁亦推至味  
心自羨是之曰甘受在口不能選斯圖先生在後進式  
頗偏往者引虎賁形貴禮不賤鬚眉浩如昨經訟奚共  
讞良辰小春閏暢月圖手展我詩述先生寒梅好風扇  
兄曙字孟陽號溪堂嘗令宿遷詩文超軼書法尺牘佳  
絕馮文肅懷人詩云太傅風流未盡蕪蕭閒欲寄步兵  
廚火攻未必非高策莫把聲名傲阿奴蓋勵暇書亦有  
晉人法也

昌平陳紫瀾少詹工書始從北海入後學東坡復肆力  
於晉魏以來諸家墨妙而盡其變有南游草其游蘭亭

詩云晉代羣賢蹟風流宛在茲欲尋修禊事不待暮春  
時古色看修竹清流到墨池行廚知有酒先酌右軍祠  
子伯思戶部高才耽酒四書文最工虞山顧備九序其  
稿云余與伯思曩弟交十五六年伯思隨其尊人未齋  
先生入楚豫顧從其仲氏太史時時見所著文余初識  
伯思時其文矜慎持擇介介不可於俗繼乃獵精雕微  
入其腠理久之益瀟博幽縱近且攝氣歸神臻於簡澹  
朱竹君贈伯思詩伯思雄于文真逸謝近晚有如古仙  
人自煮青精飯高鳳旣凌雲天葩欲滋晚相思三楚中  
忽如九秋遠少詹於乾隆癸酉任湖北學政也伯思乾



隆四十八年曾任貴州學使姚惜抱惜其以酒致疾未能極其才

馮文肅輓諸城相國詩半夜台星黯欲湮朝來音訊動中宸王商不愧稱真相溫嶠終當是毅人百事無心惟直道一生報國有清貧鑿輿過處分明記爭道天顏鎮愴神諸城獨立清修儉於自奉成哲親王題槎河山莊圖云食粟廳無馬爲田世有詩山莊其讀書處也自以爲書不及文清筇河句云小米謹題爭力勝大王製筆讓名謙姚姬傳題方坳堂所藏文正手蹟云後來董令思文律誰許王宏繼穆之竹素蒼茫千載事邱山零落

百年悲乾隆六年任左都御史疏言大學士張廷玉歷事三朝遭逢極盛然而晚節當慎責備恆多臣竊聞輿論動云桐城張姚兩姓占卻半部搢紳今張氏登仕版者有張廷璐等十九人姚氏與張氏世姻仕宦者有姚孔鋹等十人雖二姓本係桐城巨族得官之由或科目薦舉襲蔭議敘日增月益以致於今未便遽議裁汰惟稍抑其陞遷之路使知戒滿引嫌卽所以保全而造就之也又言尙書公訥親年未強仕統理吏戶兩部入典宿衛參贊中樞兼以出納王言叨承恩數時蒙召對嚮用方隆我皇上用人行政無非出於至公訥親之居

心行事當亦極圖報稱但臣慮訥親以一人之身承辦  
事務太多或有疏失又任事過銳恐逢迎者漸眾其疆  
直結主知者自此始三十八年卒乘輿即日臨哭四十  
四年御製懷舊詩列五閣臣中

竹君觀劉文正書貫休夢羅漢語于黃小華修撰寓齋  
感賦七律四首其二云權公文與晉公詩後死能言詎  
敢辭點畫精由大事辦偏傍講與正心期石人子削珠  
崖草水馬兒鈔玉局詞趨趨迎流誰解悟累余連紙許  
楊思自注公嘗手寫東坡水馬兒步步送流水句問筠  
此何蟲也筠對俗語謂之水秀才卽指庭中魚盎水面

有之因言知進不知退者似此公領之以爲然英夢堂  
有蟲詩八首其序云長夏憩釋子院荒且寂人無至者  
所見多蟲類殊嗜異各營其營又若相資爲營者夫惟  
無營足以極有營之情則豈獨憫之而已汪鈍翁二蟲  
喻云京師多蠅而赤首者爲患最甚其所嗜糞也其所  
遺亦糞也尤善招引同類羣集器物間往往劈竹擊之  
每擊必殺數百其患猶不止嗟乎蠅逐臭以斃其軀視  
蟬之茹苦者異矣有蟲細若浮塵北方土俗謂之白蛉  
善齧人雖設幬幌不能隔也民間率蒙絮衣自蔽猶能  
入人肌肉其毒逾于蚊陳子藹公嘗評之曰蠱陽而蛉

陰蟲拙而蛉巧蟲之用疏而蛉之用密其真蟲中之小人與善哉評也吾何術以避之此類皆可入蟲天志章佳文端與劉文正丁酉同年有贈延清相國詩云馬齒空慙年較長鹿鳴回首夢全違兩世平津性耽吟詠袁簡齋爲輯遺稿至嘉慶庚申始讐校付刊乾隆中巡撫鄂昌以文侍郎世臣以詩先後獲罪黃文襄之子孫又以刻奏議干議當時著作率皆藏家而不出而問世者以此諸子貂蟬世業蘭錡盈門第六子慶蘭性體沖虛甘辭華廡居相府後冰漿局後老屋數楹環種以竹每風清月白抱邾孤吟詩韵書香與竹聲相應答詩專

寫性情畫亦灑落不俗嘗爲黃仲則作雲峰閣圖錢籀  
石丙戌奉和總裁尹相國用聚奎堂壁閒韵三十年餘  
令望深得陪檢校及春深注謂相國姓衣爾根覺羅誤  
洪北江書道德經後一篇最得老氏治天下之意近人  
謂學老者病痿痺至謂後世君臣苟安誤國之風陋儒  
空疏廢學之弊猾吏巧士挾詐營私輒媚無恥之習無  
不自老子開之其言可謂妄逞胸臆而不稽事實者矣  
吳江李實君編修詩云嬴氏尙督責好用韓非言不知  
吃公子乃伏亡秦根其身則已斃其說旋以尊良由嗜  
殺身理勿使久存岐周積仁義箕疇助其源奚獨旦奭

謀亮弼貽後昆維韓闢申商毒甚燎火燔追咎道德家  
伯陽甯非冤可謂先得我心實君名重華從張匠門游  
成進士列侍從脫然去官一肆其力于詩有正一齋集

玉洲詩話

鮑辛浦月蝕詩黑心符莫人閒有懸象中天與世觀西  
岡官浙幾四十年自號待翁所著鴻爪于山水閒發凡  
不淺自康熙五十四年銓授長興縣履任三載以病去  
官雍正辛亥復除原缺又幾十年攝鹽運嘉松分司復  
往湖州勘災于是三至長興移嘉興再調海甯遷杭州  
海防草塘通判乾隆十三年卒年五十有九諸襄七三

水集哭鮑西岡通守四首云令君初締交歲在庚子秋  
余時登鄉書君罷禾中留白晷須鬢鬢炯然清兩眸南  
北地相去聲氣相應求何由慰飢渴林杜生道周道周  
雖永懷薄宦天涯馳歛然雲龍合乙巳逢京師窮巷氣  
色悽秋霖苦無時典書聊儼屋啟甌無晨炊粗分條冰  
俸贈米蒙惠詩惠詩亦孔多離合神交同乃知君子心  
不問達與窮我鄉得循吏子羽逢言公清德化吏民惠  
懷及兒童余實無愧辭君真有古風古風不可及通守  
鹽官衙旣已奪分司奈并嗇年華六十厯未周萬首留  
咨嗟蛤蜊且共食水母無聚蝦斯材乃斯用紫枸兼木



瓜

辛浦道腴堂詩古體如滇陽峽十八灘玉淵潭延建道  
中觀音崖下灘行諸作模山范水裂月撐霆諸襄七所  
謂文編笠澤叢書體詩寫魚山梵唄聽當指此種其銅  
雀半硯爲王秋駕賦有云阿瞞睨鼎挾天子橫槩三市  
悲棲烏紫色鼃聲僭閭位三臺雄峙誇鄴都幾人稱王  
幾人帝征西題墓言難誣遺臭千秋浣青史片瓦奚足  
煩吹噓多因世遠不易得飲器尙且留頭顱矧乃埏埴  
本泥土氣燄已逐飛灰徂西陵疑冢骨且朽憎人何必  
及餘膏筆力足以凌厲一切其從子之清字暉山穎悟

孰詩亦饒思致有句云雨收小市人聲聚日落平途馬  
影高全謝山辛浦墓志云辛浦爲吏不名一錢而未嘗  
以廉自見其任事尤精密而未嘗以榦吏先人其接物  
和平無忤而其中有介乎不可奪者所以一官拓落終  
身不得有力者之仗庇常侍郎問於天門唐內翰赤子  
曰浙中屬吏有足語風雅者否曰莫有過於長興令者  
矣且其人非但詞客也唐建中  
號南軒故辛浦雖旅見其禮殊  
絕于羣吏或留語移日然辛浦落落穆穆未嘗以此自  
昵累以才譖不勝煩重爲辭侍郎嘗語之曰少需之吾  
當薦君爲方面辛浦終泊然每入謁所言不出于詩文

及侍郎招物議 天子遣大臣莅其獄屬吏坐之株連者累累而辛浦高枕自如始其歎其不可及詩脫稟卽付雕曰吾老矣而無子漫爲之亦漫存之耳

常侍郎葉赫那拉氏以漕使改撫浙中乾隆丁卯見法非其罪也全謝山謂其有事於進奉屬吏爭任之以是招物議語亦不詳諸襄七行路難一詩作於戊辰中有云有若士兮東海隅誼如董仲舒孝若曾子興忠如楚三閭勇若伍子胥直哉若史魚君子若衛蘧口不能佞足不利趨退不匿賢進不避誅所肥國與民所抱楛與模方閒氣而一見孰知上帝憚赫怒銀鐙拘係填若盧

辭意若近若遠隱然爲侍郎頌冤侍郎有受宜堂集受  
宜堂者官山西時

世宗以潛藩降香五臺所賜奎墨也其古意云織女機  
倡女衣餉婦壺漿常在手商婦膏梁不厭口怨歌行云  
妾會堂上歌莫愁客喜一曲千金酬妾會花閒歌白雪  
客不沈醉歌不輟今日匱糧到雍門餘音繞梁白日昏  
歌無人聽舞誰覩曼聲哀哭揚長去信陽駐馬寄禪松  
巖云亂峰尖上半秋暉武勝關前塞雁歸四壁蒼巖松  
鼠落一林涼雨竹雞飛身浮淮水流清夜煙滿靈山雜  
翠微古驛欣逢新釀熟登樓惆悵故人違

侍郎有滇南雜詠序爲歸安吳穎庵大理應枚作也雍正十一年穎庵以編修視學滇南所遇風土山川琳宮梵剎俱見之詩尹文端在滇五載亦有倡和乾隆四年侍郎於盛京兵部官署起澄觀樓落成之曰穎庵時尹陪京携酒來賀吳昌言總憲時官盛京刑部倡之以詩傅謹齋府丞陸卷阿主事各次其韻五部司官咸爲賡和顏曰澄觀樓倡和詩侍郎序云余之於遼固祖貫也而宦游以來由晉而粵而滇而黔而彭蠡豫章之區迴思松山杏山之紆鬱大凌小凌之淪漣夢寐以之今奉命官於斯地獲與諸君子旦夕切劘彙集所作而序之

蓋喜興會之不孤且爲斯樓慶所遇也按侍郎起家刑部筆帖式出爲太原理事通判雍正戊申由冀甯道遷廣西按察使歷雲南藩臬者三載十一年由貴州布政使擢撫江西在黔時刻有醉紅亭集乾隆元年由江西入都命督理北路糧餉駐鄂爾崑有瀚海前後集其瀋水三春集則官盛京兵部時作也五年內召改少司寇有班餘翦燭集是冬授漕督有駐淮集受宜堂者其總名也乾隆閒大臣多得禍者若蔚文尙書雅爾哈善之死其枉與侍郎等皆能文章有政績而侍郎著作爲尤富其廿二史文鈔古文披金世多有之

趙秋谷題余菑邨濡雪堂詩云短日臨窗意不舒新篇  
老眼喜相於廣陵恍惚遺音在此是人閒未見書文選  
樓空地氣殘大江東盡碧迴瀾不愁淮海風流歇驚見  
三生陸務觀荆棘何人闕廣場清心愛爾獨高張二分  
明月低迷處只貯寒暉濡雪堂松陵索莫鹿門游四載  
今憐一唱酬寄謝荒波漁釣老採珠人已絕邗溝菑邨  
名元甲字葭白江都人其書堂曰濡雪取傅咸款冬賦  
中句用以名集樊榭稱其以韓孟之奧峭爲宗而復取  
材近於皮陸淵雅近於歐梅十月十八日同樊榭竹町

陳蓮峰閣

游禪智寺云禪智不受喧背郭扼荒靜良月

肆游踐步弱意則猛是時天正霜雲木蘊清景隋輦跡  
已湮但見畦與町亦有突兀車闢鐸繫牛頸高立寺門  
要寸目極遙騁竹色障爲郭岡勢疊成嶺蒲輪江外落  
商軸如舩艤淮流縈斗野昏際日氣暝此地盛歌吹側  
豔恣淫逞老佛一奄有幻作塵外境豈無虞辭輩過眼  
祇俄頃三絕片石耳轉得千禩永東坡岷峨仙愛此通  
蜀井事去飛鴻過殘刻留爪影肉存無復骨而尙光炯  
炯疏性苦耽寂深企百慮屏摩挲斷碑蹟手不畏榛梗  
憶昔陳飲餞白帝矩初秉癸巳初秋曾送客於此鑠肌暑未燿屢  
汲寒螿縶重過百晦朔執熱猶記省退院僧不覲敗葉



一龕冷淒煥雖異時吾心亦平等忽驚鈴語清天風策  
餘警沿河趣歸途煙水合溟滓同時上虞石貞石詩格  
尤悽戾幽怨與樊榭壽門龍泓授衣和酬倡其卒也授  
衣序以傳同樊榭游雲居寺禮中峰和尚髮塔詩云春  
雨回荒姿餘寒晴復陰逶迤步石徑禪室來幽尋眾山  
已秀發綠淺未滿林繞寺雉堞壯入門臺殿森阿師久  
西去遺履猶至今妙相渺難覩默契情更深合十向雲  
際恍聞淨土吟四體豈無愛諸妄惟滅心緬彼紺螺色  
香土歲月沈但餘煙草碧如絲緣塔侵平生慕禪意苦  
爲飢火燔焉知此僻境修廊靜愔愔閑湖上景悠悠

南山岑鉏聲編芳野微風忽鐘音暫憩殊有會虛寂歸

冲襟

那拉伊麟種墨齋詩集二卷附詩餘一卷其叔容齋序  
云從子夢得少余一歲善爲聲韻之言數奇不得志於  
有司從事河工未及議敘而卒所爲詩不自收拾多方  
購存訂爲一集癸卯從孫福訥登賢書乃付以存槁其  
詩如夜起云三更鐘落枕一覺月侵牀夜詩云霜濃眾  
葉白月午四山明月夜登山頂云蒼狗平吞月山魑暗  
近人均佳夢得與僖承之善集中有雨後懷用拙詩用  
拙謂收山魑句爲銀蟾暗走雲屬對尤工後往來河上

夜出成詩遂用此聯可謂點金成鐵蒼狗卽雲銀蟾卽  
月愴窘極矣伊福訥字兼五一作肩吾號抑堂幼孤從  
母受書庚戌成進士由員外郎官御史有歌風引云天  
下猛士韓彭英嘗吾鼎鑊吾能烹九州草澤富材力從  
起正復勞經營坐聽野鷹飛不下終當腐索維奔馬倚  
酒高歌誘致之乃公豈是閒吟者極寫雄猜心事用筆  
老辣其老佛歎亦沿翁山之誤近體如次韻車宜年民  
部云夢中亦覺生三耳畫裏焉能鬥十眉庚午春暮扶  
病城南遣興云春如遠客歸千里老覺浮生負寸陰輓  
常璞庵郎中云海門童丩迎梅福石室生徒憶馬融詩

筆成就實過若翁嘗輯白山詩選法梧門以夢得列兼  
五之後殊爲失考

厲樊榭使琉球記序云皇清受命悉主悉臣琉球遠在  
東南海中冀霑寵靈世爲外藩請封者至再康熙元年  
張侍御學禮銜命以行踰年歸著有使琉球記二卷上  
卷言使事下卷言風土也嘗鏤版歲久漫漶曾孫寶善  
重授劄刷琉球國貧而俗儉侍御減供御金中山久旱  
冊禮旣畢大雨三日嗣是出使者汪檢討楫則有使琉  
球雜錄中山沿革志徐編修葆光則有中山傳信錄皆  
本侍御而增益其未備其序鳥船紀略云康熙十三年

吳三桂以滇南叛全楚震動京口將軍張公思恭時爲副都統聞變卽移住武昌佐討逆將軍鄂爾琿帥水軍進勦以沙船屢敗其眾兇渠杜輝乘鳥船駛賊不可仰攻公請造鳥船至京口監其役京口船式久廢因福船之式增損之成六十艘沂流入湖連有桃花峽柳林背君山石壘之捷論者謂保全岳鄂得鳥船力爲多公字欽五寢疾彌留出鳥船紀略一編授嗣君景仲孫寶善雕木以傳按寶善原名法善字春臯鐵嶺人由奏事處郎中累官江南廬鳳道有國香堂集杭大宗翰苑集並蒂蘭云碧盃青瓷判曉光一枝分幻兩重香笑開楚澤同

心竄立並春風竟體芳露眼泣啼便采摘月華交影費  
評量宜男好與紅閨佩定有雙珠協夢祥卽次春臯韻  
作也其從父兄弟西潭觀察謂八旗三千人駐防京口  
設水師習戰備伯祖欽五公開府鎮海時見沙唬等船  
難涉大洋因條議造鳥船康熙癸亥靖海將軍施琅實  
照造以平澎臺西潭名法有買桐軒集

大宗雍正元年舉人用宏詞入翰林未久保送御史條  
陳失指罷歸其言滿洲官督撫者過多及天下藩庫宜  
有餘款存留以備不虞不可悉解內部皆切當時之務  
沈文懋送之詩云殿頭磊落吐鴻詞文采何嘗憚作犧

王吉上書明聖主劉蕡對策治平時鄰翁旣雨談牆築  
新婦初婚議竈炊歸去西湖理場圃青青還藝向陽葵  
其論詩謂漢魏以降淳古澹泊之風微富麗繁密之製  
漸興高齋十學士所選以迄周隋名曰古詩中閒不離  
儷句少陵詩千四百六篇排律多至百三十五首集中  
五古屬對者十之八九昌黎詩三百七十一首益以集  
外之詩不滿四百篇其中排律凡十五首聯句十四首  
用平韻者凡四篇惟遺興一篇不用對句餘皆古詩也  
鮮有不對者元白尤以長排見奇皮陸亦然自來大家  
名家未有不工排律而可冒託者也

莊恪親王允祿自題樂志圖有勺水拳山藏曲折小亭  
疏檻足優游之句其手書清淨經嘗刻石大宗題云朱  
邸欣多暇虔書太上經清言探紫宙妙墨媿黃庭運腕  
工無敵齋心誦可聽緹巾應十襲臨寫徧槐廳

大宗與沈欒城厲太鴻吳尺鳧趙功千意林妝域聯句  
序云妝域者形圓圍如璧徑四寸以象牙爲之面平鏤  
以樹石人物丹碧燦然背微隆起作坐龍蟠屈狀旁刻  
妝域二小字楷法精謹當背中央凸處置鐵鍼僅及寸  
界以扇手旋之使鍼卓立輪轉如飛復以袖拂則久久  
不能停踰局者有罰相傳爲前代宮人角勝之戲武林



舊事所載千日下舊聞之放空鐘之類蓋藉以銷吹

花永晝閱題葉閒思所謂妝域者也其詩云深宮晝多

閒樂事午相較嘉轍舊戲罷攤錢餘歡收握槊鶚高擎拭

烏皮圓轉走羸殼焯花背龍紋蟠巧心象齒斲昱萸香

別方勝藕粉界橫權駿一一翻衣痕千千拂巾角鶚午

鍼豈能停丁腳不須捉焯在次星離躔中規月還朔嘉轍

久行戒敬傾小住防牽确昱寶曆暈重重風車盤數數

信北南昧易遷朱碧眩難覺鶚十刻費環循一錐空倒

卓世駿鳥三市未棲蕉百回仍剝信蓬卷無根株渦洄亂

清濁嘉轍徐時影續翻急處勢騰踔焯氣竭猶蟻旋局殘

屢鶴啄

昱

文窗紛合圍紅袖競關撲

嘉

快奪金百鏃偏

輸玉雙珰

信

迴腸託防閑匪石謾謠詠

鶚

攏鬢婢爭看

扶腰女初學

嘉

鞦眉顰側輕鈿臂瘦動寬鐻

世

人語喧行

廊花光颺繡梅

焯

前塵已微茫小物尙高邈

昱

細字認

蠶眠兒嬉等燕濯

信

蒐羅譜莫憑奧衍句從駁

鶚

徒用

刻楮工相看齊一握

世

朱朗齋文藻妝域歌序云余見

樊榭手稿曾有妝域聯句詩謂是明神宗宮人兒嬉之

具後於鮑氏知不足齋見有求售者是雕漆所製上刻

神宗年號今來沛上黃司馬小松署齋出際所藏乃琢

象齒爲之其體圓徑二寸五分面平而底稍隆起正中

有臍六稜突起臍中卓一錐長三分寸之一麤如燈心而不銳可使儿上旋轉者卽此錐也六稜周刻小楷字自右而左順讀曰甲寅年七月二十四日造李得仁蓋萬歷二十四年也六稜之外雲氣繚繞於仙山樓閣琪花瑤草之間下有二鹿牝牡相倚文顯而不深其正面則樓館山樹人物皆鏤空飛動窪處大小二艇酒罇舟子相待老羽衣翩然携琴童子繼至主人謂宜作詩紀之遂爲此歌時癸丑中秋後十日其記妝域之製較大宗爲詳故並錄之

漁洋爲宋牧仲題展子虔高歡歸晉陽圖詩翁覃溪選

入七言餘師集大宗謂元郝文忠集亦有此題稱高緯  
非高歡也考宣和畫譜展子虔畫齊後主歸晉陽圖六  
幅高歡歸晉陽圖是唐張昉畫不可混也古人作畫十  
日一山五日一水或有遲之經年累月而不訖工者非  
如今人信手塗抹隨卽散失故唐以前之可稽者備載  
於張彥遠名畫記其次則恃有宣和畫譜其可考覈如  
此焉有至今日而商邱宋氏突出展子虔之畫定爲高  
歡也漁洋山人詩云紅衣執樂一千指益知爲馮小憐  
偕行之證歡雖多內寵神武紀中每歲一歸晉陽以太  
原根本之地藉婁后居守也其時方與關中構難未暇

携挈宮眷觀北史后妃傳馮翊太妃爲高澄所烝因司馬子如而事解可證芒山一戰而根基立沙苑一敗而疾遂不起使斛律金唱勅勒歌正其疾革時事任意闌入尤爲雜遝其說甚核使漁洋見之當亦首肯

吳鴻錫閩之晉江人羈旅早孤育於父友郎中噶某所及噶老子幼族人環謀害之鴻錫挺身持正卒定其家撫噶三子成立李立侯爲作吳義士傳王次山爲之詩曰忠臣不食言義士報知己由來臨大節家國無二理程嬰立趙孤王成存李氏在困志彌堅出險名乃峙世俗日澆漓舊恩棄如屣卓哉吳君事高義繼前史聞君

七歲時隨翁到浙水邂逅賢主人相依自茲始一朝痛  
終天哀此故人子嵇紹爲不孤文季信足恃提携迨長  
成報德固應爾惟是值艱危庸夫多畏蕙況當蕭牆內  
禍且旦夕起伶俜藐諸孤迫此衰暮齒有肆如鴟張有  
強如虎視主人徒周章親故隨波靡誰知羈旅身長城  
在於是君誠至性人兼亦無雙士相持一慟後全家舉  
相委挺身介其閒兇謀竟消弭延師訓諸孤常恐墮紈  
綺直從襁褓中教誨到金紫報國振窮黎賢聲馳遠邇  
九原定含笑生者不愧死君猶恐負託臨歿懷未已平  
生好施與善行不勝紀吉人天所佑有子早登仕吾友

李君言茲事信如此嗚呼今之人翻覆不知恥作詩發  
幽光庶以垂千祀

雍正元年黃崑圃典江南鄉試得人稱盛若常熟陳亦  
韓荆溪任翼聖當塗徐位山其尤著者崑圃詫曰吾得  
三經師矣位山舉鴻博不遇乾隆十五年舉經學授檢  
討杭堇浦詩云捧日頓教誇晚遇飲冰才得轉春温全  
謝山嘗與語邵子三十六宮說引據淹博位山曰君不  
讀擊壤集乎物外洞天三十六都疑布在洛陽中小車  
春暖秋涼日一日祇能移一宮是非三十六宮之明文  
乎天根月窟老氏之微言也三十六宮圖經之洞天福

地也其必以復姤之說文之者其猶參同必以乾坤坎離分氣值日而究之參同契之用易非聖人作易之旨也亦工詩有句云酒綠齋日陳三雅茶爲眠時試一槍亦韓癸丑舉南宮謁蔣文肅於邸舍文肅謂子有盛名而我又在朝今歲大魁非子誰屬遂託足疾不應廷對傲塵華滙之上清淨自養舉經學年七十九矣卽家拜司業詩多理趣詠史云子雲淵雅士爲官甚拓落守元不能終晚有美新作封禪文已慙效尤益可作後來陳子昂議論殊煒煌獻周受命頌圭璧薦闡房兩賢在平昔豈不識順逆勢利一薰心永爲後人惜西京足儒術



薦素多被徵抱經偕時髦往往見侵凌轅固食馬肝刺  
箠吁可懲王式本不來來遭狗曲憎申公傳藩國不免  
胥靡刑疇蒙稽古榮致位至公卿知務叔孫子曲學公  
孫宏烏智能擇木俊傑猶難之風塵混六合適從路多  
歧成敗豈前定事後覺前非堂堂魏鄭公佐治罕疇匹  
方其未遇時道士從李密又爲建德臣展轉歸唐室但  
期底蘊展匪矢致身一儒生議論拘引義在管忽較量  
兄弟閒母乃太屑屑清流關外村中有趙學究徑路默  
自識檢點忽相就半部佐治平功業洵卓茂締觀彼生  
平與主相將迎總用識徑智長得保寵榮不賣盧龍者

其人孰重輕

蘇黃門過楊令公祠詩我欲比君周子隱朱彤聊足慰  
忠魂王次山詩兒時愛說楊無敵今見荒祠鎮古關遺  
像魁梧猶凜目諸郎配食自承顏空山尙想搥膺恨塞  
草曾霑戰血殷若欲比公周子隱更餘佳話滿人閒用  
黃門語也英文肅出古北口詩云下馬來尋楊業廟問  
人未識李陵碑海城陳石閭景中古北雜詩我來北平  
右人指令公墳

卽墨郭華野連疏劾權貴直聲震朝野子廷翥乾隆二  
年知嘉興府嘉善好民富大等誘孩提殘損之密訪真

于法人稱之曰郭青天民有夤緣呈控者邑令與上官  
皆準其狀廷翥獨不許忤上官檄權他郡事去後邑令  
及上官皆褫職廷翥復莅郡先後凡八載政簡刑清訟  
庭草長多植梅有盛生者僵立中道適太守至頭踏擁  
仆之詢其故以吟詩對有放衙靜似阿蘭若官與梅花  
一樣清之句諸襄七嘗爲賦三水行云醜厲猖狂誰式  
遏取彼兇殘赤子活人孰無情忘召芟使君淡欲如水  
清使君截犀如水明使君持衡如水平頑鈍不才邀上  
計簞簋不飭希脫係撫字勞勞挂吏議又清風行云挹  
然耆老何不樂今年奪我使君郭使君袖裏只清風承

家節操制府公一錢不受過劉寵官橐蕭蕭兩肩聳津  
頭不聞打鼓船祇憑鶴唳聲聞天

杭州宗陽宮卽南宋德壽宮舊有穹石傍石有古梅一  
株襄七宋故宮梅石歌云華陽宮成狄難起壽山艮岳  
溝中委海棠龍柏摧爲薪絳桃垂楊半成杞二蔡二惇  
未厭亂厲階誰生勗父子崩騰靖康互絡繹淒涼南渡  
開基陟傷心細柳與新蒲滿眼殘山兼賸水六百餘年  
過故宮尙存一片青芙蓉梅花蝕盡空餘影劫殘曉月  
凌霜冬零星石柱見古礎槎枒枯樹含悲風冥冥黑水  
青楓道杜鵑啼號山鬼笑青城寥廓雪窖深一枝冰玉

同誰照冬青陵攢已無樹蒼梧路長不知處惟有長編

纂輯餘一坏義士懷終古瑛乎瑛乎吾與汝

藍瑛圖梅影石壁

所南之蘭已無土石不能言花解語觀馬文毅公彙草

辨疑書冊云辨疑兩縛公所寫捧來恍若騎箕下當時

逆帥同姓名合鑄黃金綱惡馬

提鎮馬雄絕援歸逆

孫吳作賊虛

懸軍磬聲思死封疆臣憐公僅辦擊賊笏作伴尙有中

書君怒貌鬱屈不流宕裂月撐霆排榻上畫沙空倚平

原顏籌筆數揮丞相亮君門萬里難補戈一羣那促蔡

州鷺春蛇秋蚓化爲螫筆鋒霹靂摧蛟鼉氣豪心壯臣

節禿雨粟噉噉鬼夜哭燭龍無燄一室幽埋沒驪珠三

百斛閨房之秀林下風筆幹造化天無功

其旁注者爲  
姬人願氏之

筆

閣門死難粵西復此事卻贏文信公簪花筆陣誰知

寶未肯簽名奉降表貞心不作斷腸花恨血留爲指佞  
草袁簡齋謂陸陸堂汪韓門及襄七經學淵深而詩多  
澀悶後人慎勿爲所謾也

烏程嚴遂成松瞻官嵩明州知州有海珊詩鈔紀俺蒼  
事懷明王襄毅公云城郭豐州帝制雄鉤連三鎮潰雲  
中脣吹石勒漚麻嶺血浴高歡避暑宮奇禍歸來和始  
定名經請去貢長通相臣主議民休息宋事虛徵葉夢  
熊不信漁陽突騎羸連年膽落鐵浮圖奇功忽逸桃林

塞小勝惟誇莢麥湖海若何心邀祭典闕氏有手握兵  
符西方以次皆歸款衣飾紅獅老把都五言如東坡書  
院云竹非因月瘦山不厭雲癡七言如怪鳥呼風天忽  
冷危風到地晝常陰詠物如海棠云睡味似逢鶯喚起  
酒痕仍借笛吹消梅云殘笛一聲涼在水遠峰數點碧  
于煙皆可入摘句圖

歸安沈東甫炳震著書最多新舊唐書合鈔外有九經  
辨字瀆蒙廿一史四譜唐詩金粉井魚聽編歷代帝系  
紀元歌增默齋集辭科召試未用以歲貢終弟繹旃炳  
異有水經注集釋訂譌幼牧炳謙亦膺鴻博之薦吳斯

洛云東甫生平未嘗談禪歿後半月示夢其弟雪漁口  
吟二句云飛時已忘爪消後豈知冰

襄七虛白集冬心庵著書圖云布衣所居堂前江而後  
山山冬轉清瘦江冬逾潺湲羣木勁以森其下無茅菅  
主人擁琳琅朱黃二豪刪此中有何得至樂私所慳當  
其得意時遂古一瞬間飢者可以飽迷者如得還咄嗟  
繁華子朝發夕已殷小年晒大年陋此何羈鯁茲事宜  
千秋歲寒應閉關金爍合以土石泐因以據此心無變  
滅貞元遞周摯又書景申集尾二首云周密著書癸辛  
巷許渾題詩丁卯橋徂誦冬心景申集新聲如此正寥



寥輒來絮似蘋婆果烝後梓中哀仲梨可惜都無薑桂  
性須君生手一提携三詩皆作於康熙庚子以前冬心  
與丁龍泓敬吳西林穎芳稱浙西三高善爲古詩及銘  
贊雜文晚益力於書畫畫款嘗稱蘇伐羅又稱二十六  
郎乾隆甲申九月卒詩如秋澗曲流喧枕上槐花一寸  
積門前剛得天涼三日雨秋光如水草蟲啼皆有蕭寥  
遺世之致

盤山志云李鐵君以門功當襲職病不就好佳山水晚  
卜築蘿邨課耕穫以食地居鳶峰之陰又自號鳶青山  
人其蘿邨雜詠云雙塢人煙外蕭蕭松雪翻老農今日

事古色數家邨鷺鴨通前浦豺狼到小園何須不來往  
鄰里數相存半尺清溪水滄浪或在茲草香迴峽蝶沙  
迴宿鷓鴣白髮悔他日清流信此時虛舟吾意得飄蕩  
更何之一雨柴門路紛然掩碧莎澹懷隨老至小隱畏  
人多澤雉安微分醢雞有太和寄聲舊朋好莫復笑蹉  
跎嶢峒南山口參差晚稼陳誰知荷鋤者不是帶經人  
天地容歸老妻孥怨食貧秋風看近在紅稻一嘗新耳  
目都無事空山貢寂寥飛生時探鷄稚子日承蜩蒼莽  
情焉薄胚渾器不雕初非事高尙於以永今朝石東村  
與鐵君爲世外交一廬山南一耕山北藤杖棕鞋相遇

窮崖陡壑閒無閒風雨方望溪爲作二山人傳古雲根  
石在紫蓋峰東北澗中敬衰而立高數丈石紋皴斑如  
豹玉石塘在盧家峪南長數十里其地或稱石塘峪天  
成寺舊名福善寺一題天成法界當翠屏峰之陽千相  
寺一名祐唐寺唐開元中建谿谷礪石之面刊千佛像  
寺後有搖動石少林寺舊名法興寺上方寺在嶠嶢峰  
東寺東西列靜室二陟尙存東甘澗觀音庵西甘澗淨  
土庵法藏寺舊名茶子庵寺前有法船石招提寺在光  
師臺上盤山最高敞處山下有報水村鐵君皆有詩

鐵君石塘峪詩孤策狎清曠蕭晨紆遠步坦懷足虛受

延接生妙悟複嶺抱重岡奇構見迴互石豁白雲屯巖  
張流水住人跡闕云滅殘村寄深處敗垣立缺齒老屋  
飽撐柱曰冷肥蠅穴場荒射干赴山田久汗萊依稀辨  
樵路緬彼巖棲人白骨委邱墓情專理豈斂火傳薪偶  
傅塞蓬啟長歎蒼蒼夕陽暮天成寺詩束髮牽世網衰  
謝仍漂搖往迷泥塗步今迴塵外鑿遣此殷憂懷況值  
芳春朝靈區貢隈隩淨域棲寂滲飛軒面空翠丹壁摩  
青霄肅肅山翟飛趯趯鼠跳塔鈴語真唄松雪灑驚  
鷗萬化無端倪無生自逍遙委形誠斯須揮手謝松喬  
自少林寺至西靜室詩老鸛欵密林猛虎蹲伏莽黝黝

亭午陰寥寥太空響曠懷無前期高興肆獨往化城周

大千維摩室方丈布毛證鳥窠

東鄰有僧常樹棲晝夜不下

妙諦飛

龍象儻非水精域焉啟鴻荒想縱心以天游六鑿罷相

攘法藏寺詩至味伏餘甘修塗引紆步沙石犬牙嚼人

遵虎行路壑陰塞叢莽躋荒立枯樹野風來蕭蕭若與

山鬼選道心不自鎮白日生恐怖屺嶠終古中乃具

百度古瓦栖圓榱丹華脫桓柱龕燈久無蕊遂爲靈狐

据生滅信更事此理長不住大地接慈航

寺前有法船石風波

卒誰渡胸次之高聞道之早不僅以詩論也其樂府如

射雉行烏生八九子野田黃雀行行行且游獵篇七言

如觀村人刈稼洋琴歌赭白馬歌爲慎王作皆格高韻  
遠言之有物其五十九初度作云前六十年無所謂我  
兮後六十年無所謂我兮當其有時勉求其可兮有道  
之言非漫爲華藻者也五律如上方寺云險愁巖石墮  
冷逼洞猿啼行吟石堂與山樵夜話云荒谿蝕秋水虛  
谷轉晴雷寶晉主人臨況薦青山莊云鷓冠隱几得蔬  
食閉門宜八月六日過石氏村居因卽留宿云白髮書  
全廢秋風劍不神七律如石東村寄詩賦荅云八口重  
兼諸弟在十年今見一身存廢寺云臬雛日落啼鴉吻  
狐火秋陰上女牆清微樸老無怒張蔓衍之習

鐵君睫巢集爲洪東閩所刊多少年之作邗上杜甲刊  
後集秦文恭序稱其浸淫漢魏歸本少陵其七詠序云  
離羣而居同游於秋山中者有數君焉雖物我殊類而  
天趣則同作七詠所託旣幽隱能無哀怨繁秋山自空  
響芳草又黃昏汝豈知天意愁真到耳根避霜牀下好  
還藉主人恩強水啄矜長喙煙棲藉翠衿陂塘人不見  
上下爾何心臥柳秋風弱擎荷夜雨深黃金干不惜防  
貼美人簪翡翠餘氣乾坤薄遂令秋蝶黃微生同是寄  
春色若相妨帶露仍依圃因風或過牆靡蕪善將護早  
晚度新霜蝶萬壑羅叢莽微行自有蹊秋風陰澗曲落

日石梁西擇音情真暇懸庖命不齊射生好身手珍重

寄巖棲鹿衰遲不自振蕭索涼秋天有鳥應金氣如人

正少年風霜嚴欲下燕雀寂無前養爾驅除力他時六

翮全鷹陰氣亦化物忽緣寒雨生沙明時一躍藻密動

羣行自信天全足何妨水至清長鯨數千里曾否具同

情儻魚物類各有性善君能自修一行甯失序萬里竟

何求碧水清湘岸黃雲絕塞樓有人垂白髮相共老春

秋雁春山獨游作懷人七絕句云一卷新詩達旅情望

舒幾照謝宣城侑經堂下清谿淺早晚秋蘭帶雨生謝香

祖春水東南溜一渠蕭條官舍類貧居津門昨報漁舫



發自笑公儀尙嗜魚

塞曉亭

二月春寒擁鹿皮人閒獨少

馬清癡夜來竈底無煙火自詠梅花絕調詩

馬大

韋曲

相逢竟幾春及今五十樂閒身舊傳衛國多君子獨愛

遠君寡過人

石東邨

兄弟江東歷歲時江花江草繫相思

春風並奏還鄉曲蕭瑟廬陵墓下詩

陳石閭橋洲

問訊枚臯

中酒無風簾香炮夜燈孤梅花十里蘿邨路好寫春山

第一圖

易淑南

古塞春寒藉酒消知君吏隱近漁樵宮人

爭詠甘泉頌莫更花前賦洞簫

王蘭谷

鐵君歲往來於盤山路水閒通州園亭有壑舟書屋曉

巢書屋江蘭社裘恭勤行簡潞河詩云呼風誰上晾鷹

臺曾是漁陽郡守來爲問曉巢書屋好隔隄遙想芷蘭  
開盤山之陰有惠村英夢堂謂其水木清勝可卜築詢  
之卽近眉山所居蘿邨夢堂詩稿塞曉亭招同李眉山

陸子與小集詩云一笑難逢豈信然今朝坐近陸郎邊

叔韶筆好聞宣取

宋宗室趙叔韶皇祐初進所爲文賜進士及第曉亭能詩有旨令進呈

元晏書成要共傳

眉山著尙史諸書

香覆深杯梅萼展翠縈春

幕榮絲妍可知老我思陽羨醉後殷勤問買田按鐵君  
所著尙史一百七卷外有原易三卷詩解頤二卷春秋  
通義十八卷嘗病宋史冗雜晚年開江蘭社理葺之未  
成書又著江蘭社詩廌雅菊雅等書少精音律亦閒仿

元曲所與往還者釋介閻通篆籀雪亭師善琴陸虔實  
精漢隸嘗卽席臨史晨禮器二碑陳篋公未嘗謀面爲  
作生藏誌張克復字文衡棄舉子業就學蘭陽賦詩贈  
之嘗同沈確士侍講張鳳岡孝廉集張香巖太守結根  
軒布衣朱燉抱光攻易造微廬墓凡六年有秋日過朱  
抱光及過朱抱光幽居詩姪醕甫嘗爲平江令自罷去  
宿好養生術年齒出處略同又皆無子有贈醕甫姪及  
遲醕甫不至詩余莘園爲畫江山圖易淑南華相野瓊  
邪王清遐皆爲作蘿邨圖鹿岩儵溪響雪瀨皆近蘿邨  
其自響雪瀨緣儵溪至振衣岡下云寒水帶餘秋凝陰

滙沈緣佳興躍老懷能無散幽躅石靜瀨則喧心夷步  
翻局所歷忽云遙登頓耐紆曲溪迴耳目移霜葉絢山  
木野風徐蕭颯衰颯振羣族如何無爲境亦使萬態足  
平生寡情慮此意固已篤寥天入安排繫余整初服高  
雲諒無方悠然同往復

陳石閭善書畫尤工古隸詩宗漢魏命意豪上其孤僻  
刻峭亦時近郊島雷貫一懷五布衣詩石閭居一嘗手  
書擬古詩六十餘首貽雷雷爲鈎摹上版頗精好所居  
曰大安堂其偶然作二首云大雅久湮沈管絃變協律  
濮上有新聲遂使元音失嚶嚶黃鳥鳴宛轉失其匹雌

雄互相和所志在專壹正聲不以鑿始從天地出神遇  
成連琴別怨湘江瑟樂奏各有懷哀樂帝同日宮徵易  
清商千秋味真實朱鳥棲高岡回頭修羽儀雖無變化  
術所貴見者稀豈不自韜晦文采縱橫施斥鷃顧之笑  
騫騰甘後期曜靈垂炎光慶雲幻奇姿高峰躡太虛左  
右清風馳興衰有大命造化無小私願附王喬鶴栖託  
瓊樹枝長歌行云寶劍不在手魑魅出爲崇黃金不在  
腰壯士乃憔悴男兒生於天地不及時出門貿貿將安  
之北海巨魚化爲鳥振羽一飛去天表黃塵蔽日不相  
見青雲有路何其小人之生生而不化死不靈童稚蒙

昧老無能壯盛幾時光景窄況如斂鳳與鞞鷹榮榮守  
故域戚戚少顏色白髮仰霜天憂來正如織近體如崇  
兆寺云鈴聲吟殿角澗影落松枝巖陵釣臺云一片桐  
江月千秋出世心三山口號云海颶連天走雷光並日  
懸冷月云冷月無佳色寒風帶苦聲七言如皋蘭云疏  
窗聽雨三更夢匹馬衝風六月寒得書云遠戍寒漿秋  
飲馬窮邊野火夜飛狐初秋云遠樹流光深戍火懸崖  
鑿壁野人家亦皆天然秀拔不事雕飾其寓清苑作云  
投人顏色中懷沮獨守清貧位置尊倜儻尙氣具依隱  
玩世之概宜與廌青名相埒也張南山以聲貌少之未

免輕於立論弟橘洲名景中字右方丙辰薦試鴻博嘗  
官蜀西廡青有薄宦趨雞肋之句其爲廡青移居作云  
千載田盤隱誰期此願違相憐春楚楚依舊雁飛飛山  
月來窮巷東風入故衣憐君不得意吾孰與同歸渡京  
江云大江限南北日月東西懸客子畏波浪舟師老歲  
年魚龍變春水草木萎秋天萍泛悲身世風帆落照邊  
鐵君寄荅馬滙川詩云銅柱秋風立五溪南征名字舊  
鏤題客卿馬援子字徒具封侯骨倚劍荒原大樹西滙川烏  
拉那蘭氏尊公馬期爲鎮安將軍平滇逆滙川行四以  
鎮安功予蔭不就宜補戶部庫使復不起屏居嗜學老

而不衰酷嗜畫藏名蹟甚夥好釋氏所奉皆烏斯藏佛像伯叔兄弟並後先登顯秩落落任放了無容心愛易水之雷溪築大盜庵雷溪草堂大司寇巢可託寄齋牧山居士圖清格月坡並有別墅據佳勝杖笠所如輒相探索多出奇句超人意表其園竹穿林夜有聲及雪壓雞聲冷出籬之句可謂沈思獨往妙手天成乾隆九年卒年六十七鐵君哭以詩云少小傳公子蕭然獨任真千金渾脫屣一臥竟終身爲作馬山人傳其詩規矐古人而不膠繩墨斷句尤冠絕一時烏鎮云澹雲微雨欲晴時櫻筍江南已過時桑葉半稀蠶盡老綠楊門巷賣



新絲李後主祠云古嶽寒江萬里迴昇元故跡碧雲隈

山中

一種蓬萊紫

花名

曾向金風殿裏開清明掃墓云寒

食溪邨不禁煙柳芽杏蕊賣餠天鹿門妻子牛車緩絕  
似龐公上豕年自題玉衡閣圖云崦內林廬崦外溪數  
峰青影壓籬低水沈一炷閒無事人在空堂掃燕泥上  
陽女云網戶雲深玉漏稀年年惟有淚沾衣上陽宮女  
頭如雪閒坐斜陽數雁飛往體如山中雜詠云明月滿  
空林一道秋河影律句如喜王魯傳至次韻云人來灑  
水從呼漫宅覓王官未擬休皆以自然澄澹爲宗嘗仿  
遺山爲論詩絕句今摘錄廿首可以得其趣嚮之所在

矣老驥雄豪耐爾何時時一擊唾壺歌公然作賊推能  
手可及并州夜枕戈龍性誰云不可馴雉才傷俗合藏  
身長吟目送飛鴻句自是風塵以外人陣馬溪鳧語不  
繁子猷七字解微言天機拈出詩中祕證入禪宗不二  
門栗里風開澹穆春一吟一字總天真義熙尙有關心  
事豈便羲皇以上人轢謝陵顏有定論韓陵片石復何  
言桐花槐影無人賞空爾流傳吐谷渾薛郭英才不比  
肩金華山色獨嬋娟風塵蹭蹬麒麟老好惜陳公感遇  
篇襄陽五字是余師逸韻天成更不疑挂席名山牛渚  
月青蓮詩是鹿門詩躡籥文場獨角麟曲江拈出卻清

新英雄故作欺人語詰曲整牙莫認真樂府遺音里社

詞劉郎實是羨門師

彭侍郎孫遜竹枝詞最佳

山長水遠巴中女明

月滿船歌竹枝盱眙妙句每通神瑤瑟清彈出美人莫

笑歐公厭芻豢畫圖先屬厲歸真玉溪詩法昌黎筆孔

鼎商盤各擅場千古大文終不滅人間別有段文昌彩

筆凌雲第一流穠華不復夢揚州春風豆蔻渾閒事頭

白傷春賦杜秋歐似昌黎無古奧梅如東野有清奇空

山白鶴風人旨清廟朱絃大雅詞清言蘊藉見文心詩

品仍還正始音細寫明珠穿一線遺山不惜度金鍼春

霞染岫品高流神韻多於風調求名句何曾爲畫掩流

將春夢到杭州。遶郭青山白。下深青邱。逸韻有清音。低  
徊再讀明妃曲。猶是忠君愛國心。黃岡決起少陵孫。阜  
帽吟詩白下門。幸有阿逋知已在。金陵黃一篇論定杜

茶邨眼前誰是出羣雄。嶺外稱詩獨漉翁。曾見羅浮香  
雪裏梅花開到六分中。清氣乾坤託性靈。小長蘆客許  
甯馨草堂何用龍文鼎。祇愛梅花插膽瓶。漸悟何如頓  
悟工。已公以後見蒼公。審聲論格詩人事。併入高僧妙

諦中

江陰翁。朋夫少曾奉教於西河竹垞。兩公西河序其詩  
云。意亢而舒。度遠而不拘於隅。其才思縱發。所至開適

質無不足而文又見其有餘推挹甚至精書法工章奏  
歷游大幕有倚馬之才周心羅題其三十三峰草堂圖  
云平生作客不作宦弓衣好句退方聆錢塘沈垞云豈  
有後山四六之工而無子蒼二三之歎周石帆贈詩云  
一日百函眞作手十年三賦早名家愛南池酒樓久客  
涕上馮文肅懷人詩少陵祠廟謫仙壚幾載行吟撚白  
鬢見說建安風調盡爭教不憶阮元瑜其將之北河留  
別云織就文禽作對飛一篝燈火久相依耦耕當日言  
猶在佐讀終年計轉非但使我能拋犢袴肯教君更泣  
牛衣料應不學蘇家婦金盡歸來也下機櫛文敏以鴻

博薦高文定以經學薦終不遇沈文憲謂其嘗出修脯  
代償朱某逋賦歸橐罄如告之配歡如也萊妻鴻婦曰  
首相莊詩中耦耕佐讀之言良非虛語

會稽商寶意太守以編修乞外授鎮江府同知

同時車  
宜年亦

以翰林改授杭州司馬馬匯川贈詩有左遷仍授  
職吾道莫辭貧燈火螭頭舫湖山雉尾尊之句

解官

居秦淮水榭眷一姝麗臨去出白玉墜爲贈把翫不忍

釋手袁簡齋過之投諸河以防止水使人涸而出焉累

宦邊郡投老沅江追念昔游形諸篇詠嘗曰吾鄉放翁

在蜀十年曾有所盼歸日每懷舊游屢見吟詠僕於金

陵亦然月地花天復此追憶不知身滯百蠻也詩曰選

勝鶯花幾度經吳孃低唱酒微醒誰知暮雨瀟瀟曲偏  
向蠻村意外聽何處南朝不可憐屏中樓閣鏡中船茫  
茫洗馬愁難遣已過羊車入市年鸞坊寂寞鳳臺空白  
髮吳伶話故宮外院尙橫金鈿鉞內橋誰奏玉玲瓏謝  
莊玩月憑闌坐梁緒簪花側帽歸古巷斜陽誰認得重  
來惟有舊烏衣名士當年說過江圍棋邀笛總無雙只  
今惟有青溪水九曲潺湲到客窗王德甫司寇詩温李  
風華絕代才蠻荒淪落儘堪哀逢時若比韓熙載空向  
歌姬乞食來非惟前輩風流抑亦承平舊話也

固山貝子福存爲

太祖高皇帝弟追封親王舒爾哈齊孫有云爾吟詩集  
以子簡儀親王德沛襲封贈如其爵德沛字濟齋以賢  
藩慕道德爲曠古所稀早歲藝勇絕人年二十橐弓韜  
劔篤志聖賢之學躬行實踐應襲鎮國公爵讓與兄子  
恆魯閉戶窮經三十年其學尤專於易以果毅親王薦  
世宗召見問所欲曰願厠身孔廟與特豚之饗授兵部  
侍郎遷古北口提督巡撫甘肅遷督湖廣調閩浙再調  
江南議河事與高東軒相國不合召補吏侍兼祭酒嘗  
集諸生講大學首章圓橋聽者千餘人莫不悅服獨助  
教河閒王之銳以爲未盡復陳說已意欣然下階三揖



而謝尋遷本部尙書乾隆十四年筋親王神保住有罪  
削爵以王襲封明年薨年六十九著有周易補注八卷  
實踐錄二卷其實踐錄序云嘗聞諸先民曰天職覆地  
職載參其中而職行乎變化者曰人人者動物之貴者  
也然有大體焉有小體焉秉之天者大體也受之父母  
者小體也大體終古不毀小體則順時而旣是不可不  
辨也人有二體然多徇其小以亡其大其量遂莫能與  
天地準欲養大體而不爲小體所役於匪知之艱行之  
維艱三致意焉所至黜陟一稟至公不迴避勢要尤盡  
心於荒政南豐趙甯靜藜邨由王薦舉詞科督浙閩時

携以入幕王薨後袁簡齋贈黎邨詩云儻拜東平憲王墓爲言故吏髮飄蕭王督兩江時簡齋方宰江浦也其碑銘卽袁所作

洪北江謂馮文肅詩如申韓著書刻深自喜又云近時九列中詩以錢宗伯載爲第一漢軍英廉相國亦其次也又云詩有自然超脫雖不作富貴語而必非酸寒人所能到者馮相國詠雪詩填平世上崎嶇路冷到人間富貴家之類是也錢籜石所爲夢堂詩老傳謂其平生抑然道義初嘗作吏江南其稱詩自江南知之且五十年溫潤縝密超然意象之表晚而致位政府淡交如水

置身和介之間而一寄之於詩詩稿十五卷始於康熙  
壬寅訖乾隆癸卯游法華寺云寒花當晚靜殘葉傍人  
飛冬夜書懷云霜寒增夜氣葉盡滅林聲過清芳庵云  
院涼山雨到樹暝野禽歸病後杜門云能藏我拙休醫  
孀怕受人憐轉諱貧上谷靈雨寺晚眺云雨餘龍氣留  
僧鉢漲後溪痕上石梁淡如齋漫興云階陰綠借鄰家  
樹瓶影紅分擔上花人日錢籜石過四憶齋遲施耦堂  
不至云梅邊小集還人日酒外春聲是雁天破山寺云  
環寺峰高潛瞰佛渡溪虎餒夜蹲門霜降後云不飲慣  
能留客醉愛閒偏有和詩忙風夜舟行云河聲怒欲驅

舟轉夜氣嚴能禁酒温少嘗執業於何淵若有送淵若  
從軍及哭淵若詩其卽事二首云度遼橫海近何如聞  
道櫓槍未掃除天末蟲沙難孟浪陣前鷺鶴敢踟躕伏  
波無意思歸葬馬服當年讀父書十萬貔貅雄闔外誰  
令羽檄達宸居西北浮雲作陣雲飛書旁午念紛綸邊  
人思得雲中守漢帝原憂灞上軍堅壁條侯能克敵屯  
田充國舊成勳杜陵野老懷諸將洗甲無忘慰大君雍  
正辛亥爲西師征討準噶爾澤旺作也當與望溪論策  
旺書同讀文肅輓詩人祝荔亭句云偏師秦系勁半尉  
孟郊貧荔亭潤州人能詩尤工五字其見山樓詩多名

句如汲泉動山影放鶴破天青潮聲出叢樹山翠渡空  
江落日淡空巷古藤垂老牆夢迴燈影下人在雁聲中  
皆雋永可誦恬退寡營司芒稻闡者將一紀無子歿之  
前一年復喪其偶易簣時惟二青衣在側

梅宛陵以河豚詩得名河豚出於春暮食絮而肥諺云  
蘆青長一尺不與河豚作主客斑魚似河豚而小京口  
人目之爲舅甥背青有斑文無鱗尾不歧腹白有刺亦  
善噉噉則腹大圓緊如鞠仰浮水面馮文肅斑子魚詩  
河豚罷春市斑魚上江店彭亨勢少損斑駁形頗踐渾  
沌劣無擬拂鬱怒誰惋鮮食貴及新家家競入饌曉起

赴朋招當筵已首薦翻匙雪膏滑上筋玉花豔眾賓咸  
朶頤主人雅能勸北客逢南食信美意先憚吾聞嗜河  
豚速生等齒劒是物本其黨而云性實善禍固伏所甘  
悔生在弗斷放箸謝主人拌君一笑粲感君意良殷吾  
生未敢賤終恐無忌才或似牢之悍其禍固伏所甘二  
句可以因文見道

文肅初客潤州詩云元子雅思京口酒長公會乞蒜山  
田江天浩蕩偏相趁歲月崢嶸漫自憐作伴蠹書旋啟  
篋依人襍被又裝綿誰能飽食長腰米日看金焦落眼  
前嘗謂於江南名勝獨愛焦巖其梅花四憶詩一淮浦

鳳子園一茱萸灣問耕園一鄧尉山一卽焦山謂焦之  
梅多而不林巖邊沙際時見孤蹤清曠之神江天共遠  
有寒濤激崩崖老樹清無恙瘦影墮江潭飢蛟惜空掠  
之句其四憶齋卽以此名

雍乾閒詩人詞客每多兼工書畫江陰沈鳳別號補蘿  
外史精鑒別古物嘗畫松貽文肅文肅有寄沈三凡民  
詩云江左論風裁惟君舊有聲人呼沈記室官繼謝宣  
城曾宰宣城文字懷豪飲江山積別情虬枝忽驚眼髣髴似

鬣清江都方士庶詢園家本貴公子焚香掃地蕭然如  
寒士善畫不輕爲人寫文肅嘗得其一二幀其懷人絕

句云三絕誰能數鄭虔疏髯風裁見坡仙廣陵不少鷺  
溪絹祇博先生畫紙鳶丹徒張琪字樹存號曉村能詩  
寫生入妙白下楊法已軍五字句簡淡超妙作隸書不  
囿于古無交游有少資卽呼客歡醉視其室襍被外無  
長物也吳縣徐堅孝先善漢隸兼鐵筆尤長山水家于  
光福之虎山橋文肅題孝先畫卷卽送歸吳門云虎山  
橋外記維舟曾爲梅花結伴游彈指不期卅載過驚心  
才有兩人留甲子鄧尉之游惟孝先在相逢且作無何飲老別誰知  
分外愁展卷幾回還閣筆微茫煙樹似吳洲馬滙川亦  
善畫塞曉亭題大益山水小幅云畫筆詩情兩共閒林



巒蕭散有無閒水雲一片倪黃意恰似雷溪屋外山題  
雷溪居士水墨小幅云山氣靜應淘晚熱水容淡欲洗  
清塵遲看放鶴雷溪上澹泊搢頤讀畫人

文肅秋夜懷篁邨詩秋夢忽不果秋思滿涼月涼月墮  
西堂蟋蟀猶未歇見篁邨所畫虎山橋游蹟感題云姑  
蘇城外黃村路細雨籃輿問草堂臘酒拌成連夜醉梅  
花消得一春忙魚箋淡墨仍虛壁松塢新阡又夕陽往  
事銷沈故人盡鬢絲蕭散對鑪香此張篁邨也長洲人  
名宗蒼字墨岑長身清癯自號瘦竹工詩畫山水師獨  
往老人嘗寫秋江晚渡圖寄文肅文肅爲題二絕云寒

山淡淡水瀾瀾誰寫幽憂寄所思記得峭帆催客去半  
江斜照別人時煙浦霜林倦眼開無端別夢久低回如  
何一葉寒波上載得愁來客未來同時有陶篁邨名元  
藻山陰貢生有鳧亭詩話

文肅吉林道中詩有云雙輪不碾輜車異一木孤浮渡  
艇長謂爬狸及威呼也爬狸如車無輪有牀無廂馬牛  
皆可駕尤宜於冰雪可以載重行遠威呼小舟也剡獨

木爲之狹而長雖巨流可濟方鳧宗今樂府腦温江邊  
威瓠波江口行人日來去  
不聞江岸集烏檣但向山中劔獨樹獨樹劔成似葉輕  
長身窄腹波上行不忤不漿一篙水破月飄煙縱復橫  
有時縱橫撤大網網得大魚供客餉有時並榜過輕車  
車輪縛木篙徐徐朝朝暮暮瀟聲裏秋風吹雪江冰起

幾日江冰凍不開  
其東行雜詩云  
寒色帶新霜  
行人總  
曳君長臥  
枯篙底  
急裝茅柴  
團廢堡  
斥堠上  
層岡  
戍卒兼農事  
居民半異  
鄉山顛還  
駐馬風帆  
在重洋  
宛轉蒼龍脊  
迴環綠玉屏  
巫閭三百里  
面面向人青  
見說桃花洞  
飛泉雪不停  
嚴程催驛使  
幽賞負山靈  
翦破寒波色  
河冰放渡船  
營平分一水  
遼河東岸古營  
州西岸平州  
割據每當年  
山隔元菟郡  
潮通渤澥天  
低徊形勝地  
從此控幽燕  
四海爲家久  
留都記始興  
戰塵銷百載  
佳氣鬱三陵  
煮海人無禁  
燒田賦未增  
五侯閒子弟  
霜野競呼鷹  
冰雪兼泥淖  
暄寒覓路行  
盤雕翻日影  
歸衲赴鐘聲  
墾野新增戶  
分邊舊駐兵  
古

牆人拆盡猶號句驪城草屋平無脊泥牆缺作門經營

兼父子偃息共雞豚沙井空心木牛車曲頂轅客來容

借宿三戶老民邨

遼地多流寓呼土著者爲老民

野塘荒葦亂攬轡重

脚踏遮馬奔驚兔鑽冰出凍魚遺城失遼隧列障到扶

餘八百滄溟路齊煙入望疏

牛莊在海濱古遼隧縣地南對登州相去八百里

遼海以東爲

祖宗提戈創業處數詩於邠岐風土略得大凡讀第四首尤感不絕於予心也

文肅家北城曰檀欒草堂街南壘石架閣曰獨往園可

眺城西諸山羅兩峰嘗爲寫借山樓圖蔣文肅賜第在

藜光橋與獨往園鄰近戟門司農常招同人修北臺之  
集夢堂葺石均有詩

準噶爾本蒙古厄魯特人元置駝馬牛羊四部分駐西  
北邊準其牧馬部也今外藩四十九家多元後裔準噶  
爾語言字畫皆同蒙古而諱言爲蒙古人以此康熙閒  
準酋策妄阿拉卜坦來犯邊

聖祖親征至各多里巴爾哈孫西北望鄂里雞圖有山  
如案平衍長百餘里賜名玉几山策妄阿拉卜坦敗衄  
遁居窩克阿拉里經年譯名慈母湖距科布多二日程  
所部至食魚爲活旣死其子策凌襲爲台吉殺其異母

弟舒魯達瓦阻伊里河而居其河深廣須舟筏乃渡西  
路自巴爾庫軍營至其地二千六百餘里較北路爲近  
策凌二子嫡子多爾際那木札兒庶長子喇麻達爾札

亦相讐怨雍正壬子六月準噶爾寇邊至吉爾馬泰距

厄爾得尼招已近

招乃招提省文喀爾喀王策合部內厄爾得尼寶也地產金銀故稱寶寺

虜據南山我兵列長陣與山對分兵繞至虜後砲發半

山虜陣大亂山盡處卽鄂爾昆河時方屯種堰水益深

多墜河死索倫精兵萬箭齊發殺數千人

李鐵君鄂爾渾詩序壬子

六月策麟駐師鄂爾渾河差惻林遁多率騎三萬至我師擊之日旰未決策麟使謂之曰止詰朝相見旣解策麟鳩士卒而謂之曰客三年矣舍此胡底乎幸而遇敵盜死于是蓐食易馬將夜起乃別遣騎驅其乘馬歸遂

薄之寇驚求馬不可得陣亂相蹈藉射之矢立盡益而復之殲三之二焉既明視之河水皆赤方戰之疾也遁多子臬而捷騁而刺策麟幾及之衛者曳之墮墮而衛者亦中矢墮遂生獲之用祀大纛羌師大奔所記爲詳時鄂文端經略西北兩路軍事平郡王以定邊大將軍統師北路進勦征兵三萬配馬十二萬匹擇地分廠委蒙古官兵牧放以時驗其肥瘠役外藩者持理藩院印票所至供羊馬如數羊或全或半或一蹄視使者貴賤婦子露處空廬帳以居使者名爲拏騫拉卽捉役之謂馬之未鞍者曰額爾賓踉齧騰趨不受銜勒蒙古健兒以竿索約繫其腦項捉而騎之行次招華在張家口外三百里勅就牧所賜大將軍馬數百闌廢堵中印烙有伍巴什者

捉馬馬怒立什於馬上磬身擒其雙耳股全離鞍馬前  
後努突項益下終不得脫去自張家口至烏里雅蘇泰  
軍營凡四十七臺十六腰站出口至大壩爲第一臺壩  
卽嶺也蒙古稱達巴罕自張家口至山西殺虎口沿邊  
千里窯民與土默特人咸業耕種北路軍糧歲取給於  
此土默特部卽明土木大同城西三十里雲西堡有雲  
岡寺後魏拓跋氏建歸化城本名枯枯和屯蒙古謂青  
爲枯枯謂城爲河屯譯曰青城蓋因大山得名爲北征  
孔道大將軍費揚古平定策旺阿拉卜坦歸化城立祠  
祀之岑嶺高處積亂石成家名嶧博謂神所棲經過必



投以物物無擇馬鬣亦可將誠周官犯軼之祭封土爲

山象以菩芻棘柏爲神主嶧博意亦近之

謹案高宗御製詩注滿

漢文音義不同不可取漢字強合滿文方觀承引軼祭行路神之義失之鑿矣第十六臺爲博

羅哈蘇圖入瀚海慮帳不居凡七日瀚海卽古流沙蒙

占呼爲戈壁東西亘萬餘里徑千里或四五百里沙石

茸雜無草土山色盧黑焦赤無生氣詫怪鹵莽無起落

向背分合之形其通準噶爾者爲習里哈戈壁跡罕至

荒昧爲尤甚焉二百里至麻尼圖一井清深井東數十

步有泉泉上石洞鑿涌泉洞三字諾明戈壁舊有石臺

呼爲達蘭土魯相傳漢時築蒙古謂七十之數爲達蘭

峰爲土魯青金石爲諾明今其處平沙無山或云峰乃  
烽之譌古謂墩爲烽漢時傳烽塞上爲第七十烽猶今  
言七十臺也查克拜達里城在三十六臺地產查克木  
故名引鄂爾昆河屯種略似甯肅渠工綠旗兵屯種於  
吉爾馬泰傍近鄂爾昆河元太祖曾墾牧於此大軍駐  
察罕搜爾柵木爲城近移烏里雅蘇泰遂屯糧於此運  
道由上海較軍臺爲近自京師至軍營計六千餘里郵  
筒八日可達草青馬壯纔須七日將軍大臣皆頒賜鑰  
篋陳奏批荅以重機鈐迎送行九拜禮軍中帶刀爲儀  
白大將軍至士卒皆然相遇輒比試以爲樂元旦行朝

賀禮蒙古諸藩皆至禮畢班坐廬帳中命茶如儀凡分  
兵命將先選兵如數自參贊大臣以下有統兵之職者  
咸集軍門隨印內閣學士以名上大將軍擇將既定用  
紅紵奉令箭下教具機宜授之以行當待命之際諸軍  
不知所屬諸將未知所向令出而一軍趨之如水之赴  
壑焉副將軍印惟分駐乃用之同在一營則送大將軍  
所其諸將印如建武揚威有名號者皆願自內府遣發  
時佩之甲寅六月大將軍王自烏里雅蘇泰進駐科布  
多城科布多河在烏里雅蘇泰西北千里濱河爲城大  
兵駐此科布多箭橐也阿爾泰山東面之水皆入此河

與札布韓河合由愛拉克湖伏流入於烏卜藏湖北渡  
科布多河至薩克里山麓有石人具蒙古冠服相傳爲  
元太祖像以示遠國之願瞻仰者烏鼠同穴科布多河  
以東徧地有之方午鼠蹲穴口鳥立鼠背蒙古謂雀爲  
鼠之甥北抵阿爾泰山尙千里阿爾泰山譯曰金山或  
云卽古金微極高峻八月雪齊馬腹定邊左副將軍喀  
爾喀王策令遣兵七千以十一月度阿爾泰越二千里  
至額爾起斯準噶爾部眾遁去乞降者數百帳杭靄格  
喀爾喀境內名山松多泉美其最高峰曰鄂託渾騰格  
里譯言少天也杭靄阿爾泰山陰盛產松榆山陽濯濯

鄂爾昆河河源出頑靄圖拉河源出韓山會入厄格色楞河繞俄爾斯南界西流與結締河合歸伯該爾湖阿爾西南之水皆入額爾齊思河西流空窩圖河又萬餘里歸西海鄂爾昆寬闊也額爾齊思峽也峽束如江爲西北第一巨流畢赤克圖有字之謂也山在頑靄之南石壁如削鑄度入經用古梵書喀爾喀韓山諸部夏晝冬夜至六十三四刻地軸已高晷影爲近夜帳恆明定邊右副將軍塔爾岱黑龍江新滿洲人屢破敵有威名戴獺皮小帽如索倫製準夷稱爲獺帽將軍索倫入圍隸黑龍江將軍卽古黑水部其人勁弓善射以獵爲生衣帽皆以獺皮爲之準夷畏之見輒卻走嘗深入敵

陣身被七創馬亦帶傷復中火槍仆地塔射殺一賊奪其馬裹創復戰仆馬忽甦揚首長鳴而起衝突與俱不離左右馬色正黃索倫產也塔置棧親飼之雍正十三年七月撤兵移駐台米兒十一月大將軍王奉詔還京右皆方恪敏從軍雜詩注中語恪敏時以布衣授中書爲平郡王掌書記也其末章云畏吾兒部古纏頭烽火連城苦未休願掇蒲萄隨漢使年年瓜熟貢伊州注云哈密古伊吾盧地唐改伊州與畏吾兒土魯番皆爲回回部其俗以白氎纏頭自哈密西至土魯番城八百里又西約三千里皆其境土庫察城阿克蘇城凡十數處

一城多至萬餘家其人循分務耕作錦帛略如內地產  
綠蒲萄無核味甚美其近準部者頗爲所侵暴咸思內  
附循此一路至葉爾奇木爲回部遠境在伊里西南準  
夷地瘠人復媮惰食用皆資於回人哈薩克亦回屬也  
在準噶爾之北與布魯忒連界卽古大宛國其人悍鷙  
善火槍來去儻忽準夷畏之由兀良哈可通彼北困強  
鄰西南盡失其外蔽則伊里所恃之險如他犁奇等亦  
無所用也當坐見困敝此特就當時之形勢而言之也  
迨至乾隆閒平伊犁收回部兵屯候尉聲教之暨訖益  
遠矣

桐城馬樸臣相如與方貞觀履安林谷同聲襟情交契  
南堂寄懷句云自入秋來常中酒一從君去斷吟詩其  
交情可見也南堂曾隸旗籍雍正元年放還相如少卽  
工詩寓揚州天甯寺有句云客到幾人曾跨鶴我來三  
月不聞鶯乾隆丁卯卒于京師其弟蘇臣湘靈屬陶篁  
村索遺稿於沈平山篁村題云山陽人去笛聲秋斷紙  
零縑小宋收七字淒涼三月客不聞鶯語住揚州其子  
騰元刻於甲戌

鄂休如尙書參贊伊犁與誠勇公班第同死阿睦爾撒  
納之亂五言如首山朝陽寺云松頂平鋪地潮聲直上



樓獨夜云天地隨高枕風霜自敝裘七言如過松山渡  
小凌河作云山含嵐氣晴飛雨海接天光水似雲登首  
山絕頂云鷹窠高寄浮雲外鷗背低翻落照迴清挺之  
氣拂拂行閒王蘭泉謂在雲南過嵩明州海潮寺懸剛  
烈海暗雲無葉山寒雪有花楹帖是從西林相國督黔  
時書筆力峻拔在歐褚閒想見棲身絕域握拳透爪之  
狀公子鄂岳舉其遺詩彙本盡以畀法梧門研鍊洗伐  
塗乙改竄者甚多出關以後之詩則不可得矣伯熙嘗  
謂張鄂相攻而虛亭書法瘦硬通神乃大類天瓶居士  
亦足異也

熙甯壬子清明東坡看花於錢塘吉祥寺金盤綵籃獻  
花者五十三人有吉祥寺中錦千堆之句三百一年爲  
洪武壬子楊孟載清明日看花於西江省掖亦有詩又  
三百六十一年雍正壬子清明平望王藻載揚徧邀輦  
轂名人集故相國王文靖公怡園追和蘇楊兩先生作  
凡二十人各賦七言古詩一首張文敏亦有詩紀之納  
蘭氏門材稱盛良誠伯純良明仲欽峻德克明三人皆  
與焉克明詩云雍正十年歲壬子清明約看城南花吳  
江王藻招作會熙甯洪武無等差保祿在中詩云東坡  
久不出孟載亦已矣一朝風雅擅千秋六百年閒兩壬

子吉祥古寺荒蒼苔西江省掖安在哉更逢我輩文酒

會看花又到城南來克明一字慎齋歲貢生官戶部筆

帖式有使秦集

富察家宰託庸有庚子冬滯河送克明赴陝詩

望潼關云立馬

風陵望漢關三峰高出白雲閒西來一曲崑崙水劃斷

中條太華山舟次與思恆話舊云年來朋舊各褰裳那

意逢君此對牀話到傷心同不寐五更篷背雨聲涼春

日懷黃璞齋云青門昨歲送歸驂記折垂楊酒半酣紅

杏花開人不見小樓春雨夢江南懷佟咸亨使杭云一

自輕帆挂早潮武林煙月夢迢迢不知紅藕花開日船

泊西湖第幾橋皆有風致其趙北口銅雀臺西陵感舊

諸詩爲湯緯堂所稱在中一字兩邨有野人居橐留別  
云擲卻毛錐望朔天笑提長劍出幽燕終南風雪崆峒  
月醉眼看山到酒泉醉後作云可人只有陶宏景得意  
誰如顧憲之載揚號梅泝有鸞脰湖莊集其題桃源圖  
云相看何物同塵世只有秦時月在天讀梅村集云百  
首淋浪長慶體一生慙愧義熙民

景葦侍郎介福爲元舅國綱孫悔翁尙書從子居佟府  
舊邸在東城燈市口其早春偶作有云鳳城煙火懷燈  
市江國梅花夢竹扉王蘭泉同朱竹君學士過介座主  
受茲故第詩金張甲第禁城東辰巳曾悲昔夢空燈市

仍看明夜月經帷誰與坐春風祇留虎觀文章在回望  
龍門涕淚同更憶名園郊外路琴書寥落野棠紅景庵  
主順天鄉試者二主江南浙江鄉試各一己巳以經學  
薦錢穉石周元牧辛未甲戌丁丑皆爲總裁有詩云三  
見門生是狀元庚辰復典會試穉石和詩有四見狀元  
門下放兩陪夫子院中吟之句于文襄嘗贈聯云天下  
文章同軌轍門牆桃李半公卿壬午扈蹕江南薨於舟  
次穉石輓詞云素業元勳裔清風外戚門身相依禁籞  
歲屢從邊垣古句陶韋倣眞書趙董論斜暉方下直獨  
樹自開軒簡在 先皇早恩霑聖主多寅清資典禮喜

起拜賡歌經笥奎朗公門桃李羅豈惟熊孝感盛事  
欲兼過講幄承皇子詞林式眾仙帝巡河海日臣扈雨  
暘天伏枕醫來亟去吏切乘舟命返遄葵心終報國屬纊  
尙纏縣都統蒙加秩朱棺許入城賜金資大事權厝傍  
先塋壽母難悲苦孤兒未長成感恩求所慰號慟徹門  
生著有西清載筆錄退思齋詩野園詩集留都集關中  
紀行草采江小草

遵化州馬蘭峪去京不三百里爲守陵百司所在王蘭  
谷長住原名蓮字松儕號柳溪世居馬蘭峪以包衣監  
生任 景陵八品茶上人由慎郡王薦舉鴻博累官內

務府郎中管理官學詩才清綺李鐵君稱其少年勇于  
爲學有一日千里之勢嘗有詩云萬石旣醇謹二馬還  
通方少年事古處更得琅邪王祝豫堂舍人奉陪瀆郡  
王謁陵有往還投贈之什其贈李純九詩云淮海賢聲  
廿載餘又從淑問服官初夢回塵世詩情遠心寄雲山  
宦味疏苔蘚映階飛雀下芰荷隔水晚風徐高槐蔭滿  
西華路白首重來檢簿書時同徵者晚亭眉山橘洲愼  
齋外構園太常西成字有年乾隆甲子以戶部郎中副  
沈文慤典試湖北號得人有玉雨堂集其秋懷云秋色  
何其悲天風下衰草帝城天北頭畫角聲吹曉嗚咽隨

風揚淒涼長安道念此不能眠惻惻心如擣自古功名  
閒誰能致身早石夫歲貢黑瑒舒舒覺羅氏杭堇浦稱  
其家居教授雅有儒風詩格亦極蕭澹秋興云西風應  
是徧天涯開滿池塘白藕花有意不關沙上鷺傷心難  
訴樹閒鷗醉鄉但可千杯盡鏡影還驚兩鬢華老景那  
堪對蕭瑟平生回首事空嗟

胡雲持送秦涇幼湜歸邵陽詩相士常苦衣相馬常苦  
肥古來豈不然勿謂今更非秦士焚舟來超乘爭騰希  
自許一戰霸空振千鈞機仍將片葉身遠向灞岸歸灞  
陵夜半雪南山奪光輝句芒遲遲春倉庚鳴不違浮雲



浩茫茫安知所從依謾謾秋樹林下有雙石扉逸竹闕  
青火亦足忘寒飢去矣忽歎嗟各自從風飛幼湜布衣  
樸學關中推重杭大宗謂其古詩樸老疏硬似其爲人  
沈麟洲元滄爲查仲韋學士愛壻博學工書議敘文昌  
知縣子椒園廉使少受詩法於初白樊榭詩所謂應是  
本師查長老也麟洲坐事編管甯夏每歲省覲其別母  
云雲影有心隨望眼綫痕和淚綻征衣秋懷云境當安  
穩誰知足事到分飛始信窮遣懷云秋生紅豆辭南國  
春到青銅赴朔方樊榭謂其纏綿悲惋本於人倫天咫  
之故而合於四始六義之旨兄心字房仲有孤石山房

集

胡雲持有褚千峰歌千峰名峻邵陽人與牛空山同撰金石經眼錄復取古來碑碣摹其字形約其圭趺之式紀其尺寸名金石圖王良齋峻爲作序其後烏程陳經抱之有求古精舍金石圖許周生題辭甚工

全謝山年三十六娶滿洲學士春臺之女見隨園詩話按鮎埼亭年譜先生前娶張孺人三十歲續娶曹孺人於京師云三十六歲者誤也春臺字錫祺康熙癸巳進士謝山丁巳歸班呈李穆堂絕句五首其次章曰申轅報罷董生黜更復誰同汲直羣自分不求五鼎食何妨

平揖大將軍末章云生平坐笑陶彭澤豈有牽絲百里  
才疏未成醜身已去先幾何待督郵來自是家居不出  
乙丑陳句山以書速出山謝山答詩有云寸長尺短誰  
相量北馬南轅我弗任又曰苦不自知吾豈敢將一  
擲試微軀乾隆十六年南巡梁文莊將薦之賦詩云木  
雁遭逢豈可班羞居材與不材閒故人爲我關情處莫  
學瓊山強定山

謝山云南渡而後郭忠恕徐鉉之篆無有繼者而党承  
旨獨以其墨妙雄于河北承旨與稼軒友善稼軒之詞  
承旨之篆真河北雙絕也予得其濟州普照寺篆碑四

通明昌六年四月寺僧知照所立石又云清容跋承旨  
所篆杏壇二大字以爲風雲之意藹然千載一日今相  
去又四百年豈非孔林之墨寶耶承旨署名自稱門生  
亦新奇歐陽公曰受業者爲弟子受業于弟子者爲門  
生承旨源流得無遠乎中州集載皇叔永蹈伏誅承旨  
作詔云天下一家詎可窺於神器公族三宥卒莫遣於  
常刑非忘本根骨肉之情蓋爲宗社安危之計亦由涼  
德有失睦親乃於閒歲之中連致逆謀之起恩以義掩  
至於重典之亟行天高聽卑殆匪此心之得已興言及  
此惋歎奚窮論者謂承旨制誥金源百年當爲第一紫

幢老人嘗記其向得舊畫一幀上有党竹溪題云雙眠  
雙宿水平溪共看秋光在兩隄誰信瀟湘有孤雁冷沙  
寒葦不成棲大定十年十月余之官汝陰漁川寫此圖  
贈別余行至徐橋道中偶書一絕憶與漁川泥酒郇城  
時恍然在懷党懷英題詩亦有致

沈文慤風霜欺短褐星髮入歸舟頗似老杜其門下詩  
人稱盛周陳顧青嶼上舍居木瀆讀書賦詩外世事不  
求甚解詠白蓮云玉井分栽到野塘冰綃翠袖迴生涼  
半江殘月欲無影一片冷雲何處香真相尙留開士社  
紅衣盡洗美人妝水仙操罷扁舟去誰與淩波解佩璫

女夫章日照緝其詩以行蜀道集尤勝嘗繪細雨騎驢  
入劍門圖客馮文肅幕最久文肅河祠舊寓感懷青樓  
詩云落拓江湖鬢早皤相依南北忘蹉跎寒祠賦雪驚  
河伯春圃攀花惱郭駝前度客來裘屐杳十年心負友  
朋多留將一段華陽錦好薦椒漿配楚歌欽棊自甫里  
移居臨頓里文慤寄詩云移家自得天隨友偕隱相携  
孺仲妻向其閒吟追汐社近聞直釣坐清溪行藏齒冷  
乘軒鶴文采心驚斷尾雞何日隨君還故業一蓑煙雨  
課耕犁其登北高峰絕頂云不知曉雲過但覺衣裳冷  
清飈動林薄初日照山影寫景清迥異常經邦祿百詩

略相似皆長洲人

祝豫堂爲涪邸上客舊業龍山去澈浦之永安湖百里  
而近錢擇石詩扁舟澈上作新社不用人歌山鷓鴣用  
元人汎永安湖啄花鶯坐水楊柳雪藕人歌山鷓鴣句  
也嘗與朱沛然陳乳巢王受銘及擇石合訂詩卷曰南  
郭新詩子明甫孝廉喆工畫梅與楞山壽門韻頗

錢唐王介眉延年與其弟步元孝廉騰蛟並薦大科嘗  
以史編經進賜官學正擇石題其紀夢詩後云國子先  
生冬病腓夜夢有適戶闔扉立者胡來陳承祚坐者不  
識習彥威三揖立者荅且顧一揖坐者蹇弗揮立者乃

指坐者語帝魏之正其庶幾前身後身君豈憶盍卽寫  
此吟依稀白頭累舉猶未第史學可傳復何祈風寒夢  
回紀其二一十四字懷珠璣足成六章章四句說夢向  
人人笑譏蓋嘗夢至一室一人揖而言曰余漢之陳壽  
黜劉帝魏後人以爲口實指榻上人曰賴彥威先生正  
之汝乃先生後身手授一卷俾題六絕句寤後僅記二  
句曰慙無漢晉春秋筆敢道前身是彥威其事雖怪然  
較之動輒言夢見孔子者爲韻勝矣

夏英公琵琶亭詩流光過眼如車轂薄宦拘人似馬銜  
若遇琵琶應大笑何須收淚溼青衫用意甚別乾隆癸



亥唐俊公重爲修葺有春游琵琶新亭倡和草未涵齋  
有題重修琵琶亭繪圖詩蔣心餘琵琶亭別唐蝸寄使  
君詩云老樹四圍虛閣隱晴嵐一綫大江吞可函蓋一  
切也李穆堂序其陶人心語曰公工詩文書畫戊申督  
陶政於浮梁龍綱均窯追復古制嘗權兩淮復權九江  
十年以來珠山昌水見之筆墨爲多其起蛟行云起蛟  
起蛟天茫然好生好殺敢問天一蛟方生萬戶死江左  
江右常若此避蛟不及民可憐江邨谿堡深淵填蛟生  
於天何功德民死於蛟何冤愆將欲殄惡彰天討洪濤  
窟穴淵其淵或謂民孽應浩劫狂蛟司命天無權蒼頭

黔首蚩蚩子骨肉漂流一時死豈追捉月水仙游懷沙  
慘葬魚腹裏攀流觸浪命懸絲呼救號天聲百里縱使  
萬死漏一生廬舍田園空逝水今宵新鬼昨宵人昨日  
富室今孤貧一草一木天生意忍驅赤子飽彼窮淵鱗  
天高聽渺渺水浩波無津安得周處當年劒馭神寰海  
搜窮瀆盡斬蛟頭掃孽種安瀾永靖千萬春巨來激賞  
尤在此篇陳文恭伐蛟說所言徵驗政治之法甚詳惜  
俊公未之見也杭堇浦爲僧願子題唐權使八分詩卷  
頗贊其書法之美子芝圃兵備寅保亦工詩過庾嶺句  
云竹護空亭雨松鳴野壑雷

錢竹汀宋史稿跋云陳和叔宋史彙共二百十九卷其  
糾舊史之失謂韓琦與陳升之王珪同傳陳東歐陽澈  
與宋季一僧一道士同傳康保裔戰敗降契丹官節度  
使事見遼史而以寇忠義杜審琦卒于天成二年而以  
寇外戚凌唐佐本紀旣書降金而又入忠義李穀竇貞  
固皆五代遺臣入宋未仕不應立傳皆確不可易於姦  
臣傳進史彌遠嵩之而出曾布與鄙意合然前後義例  
未能盡一紀傳無論贊志無總序蓋猶未定之稿王蘭  
泉懷人絕句門對葑溪流水碧秋槐落葉覆閒庭柯維璞  
王惟儉舊本叢殘後新史何時付汗青和叔文道先生景

雲子雷翠庭稱其曉世務食貧著書有新唐書刊誤謚法考導河書性獯介少許可晚年爲人所構幾不測賴彭大司馬啟豐白其誣得脫又一年以疾卒桑弢甫哭和叔詩晚爲孟博銜憂憤死比黔婁守賤貧

青浦胡鳴玉吟鷗著有訂譌雜錄沈文懋嘗集唐贈之云漢南詩老猶存社魯國諸生半在門卒年八十三  
仁和汪臺抱璞爲湯西厓少宰壻南屏坐雨句云雲氣半遮山下塔秋光早入水邊邨家有復園因以自號嘗取陳簡齋亭角尋詩滿袖風句繪亭角尋詩圖

錢塘汪氏有聽雨樓康熙甲午至戊戌舍亭孝廉招樊

榭主其家塾課二子汪沆師李與兄浦蘅洲先後列弟  
子員蘅洲早卒師李沈敏多才屢爲諸侯上客樊榭贈  
句云舉麤書好才稱捷橫製詩成氣自雄杭大宗序其  
津門雜事詩云吾友汪君西瀨滯淫是邦以詩傳事夫  
攬奇紀游之什大抵詳南而略於北西瀨抽妍騁祕豈  
非省方者之惇史乎得樊榭詩法其盤西紀游之作如  
託根莫嫌孤特立物所尙詎識快心地人生有跼步締  
造縣一紀役罷萬夫瘠生年誰滿百辛苦營臺榭山林  
俗不爭遺榮亦遠辱諸句皆有名理東堂觀劇句云久  
識人生同爨演銷沈不待管絃終讀之輒爲悵悵

歸安姚念慈世鍊丙辰薦舉詞科丁巳補考報罷鄂文  
端公薦修三禮書成將特薦館職而文端薨僅敘縣丞  
念慈哭公詩云未報公恩徒一慟自憐此淚亦千秋又  
感賦云雕刻千言雙鬢苦挽回一命萬牛難又云折柳  
魂銷燕市酒開箱淚墮晉公縑選授長沙縣丞以病去  
任陳句山爲京尹延爲金臺書院山長後辭赴山右鄂  
中丞弼之招句山贈詩云罷尉河西遂去官客中爲客  
感無端青山直指雁來路白髮行飄風裏冠生計幾時  
歸雪水故鄉今日是長安東門帶草叢叢在待繫先生  
去轍難申拂珊副都次韻云山長新如得好官夢餘休

更惹愁端才名不愧陳蕃榻豪氣曾輕貢禹冠久住忽  
成千里別強移聊借一枝安草堂資要隨時蓄垂老依  
人畢竟難中丞文端子也

瓜田逸史張浦山幼不樂科舉業嗜畫及詩與錢氏比  
鄰封君廉江先生令與文端同學表姑南樓太夫人與  
講明六法山水自成一家博學工文所爲劉崑諸傳有  
史法一對大科放還山杭大宗桂堂席上送其還長水  
詩京國朋歡半淪謝菰蘆詩格獨清嚴嘗主湖州太守  
李堂李署其室曰浦來軒乾隆二十年卒年七十六

李越縵先生論詩絕句云學福清才自絕儔經生吐屬

最風流何當摘句圖重繪樊榭漁洋一例收謂華亭沈  
沃田也陳亦韓序其詩謂才多而不雜思敏而能密康  
熙丁酉學使昆明謝坤侯科試松江取冠鄉校謁見時  
謂吾試江蘇八府二州士不乏取上第如拾芥者然他  
日能讀書崇古學惟子一人而已其爲學遂干經史旁  
通九宮納甲天文樂律九章諸術客安居王樓山陽湖  
潘敏惠幕最久樓山陳臬嶺南問士於薩方伯以沃田  
對時客青浦王述文學使所卽日禮迎論詩而合縣歷  
數載樓山以乾隆七年卒感國士之知編次其詩序以  
傳世



惠定字徵君四世傳經曾祖有聲字樸庵精於詩祖周  
惕從堯峰侯齋游嘗有句云花浮小盞三投酒乳潑深  
壚七品茶以辛未庶常改密雲知縣揆凱功挽研溪詩  
自別蓬山分百里卻臨花縣只三年初由東渚邨遷居  
郡城東南冷香溪之北郡城東禪寺有白鴿禪師所種  
紅豆老而枯矣至是復生新枝研溪移植一枝於庭生  
意郁然僧睿目存爲繪紅豆新居圖自題五絕句又賦  
紅豆詞十首和者二百餘人因自號紅豆主人嘗夢東  
里楊文貞公來謁而生天牧學士遂以文貞之名名之  
有半農人詩徵君論詩謂唐音古淡一派前賢隸爲逸

品畫家逸品在神品之上詩畫本同趣也予嘗讀前明徐昌穀高蘇門楊夢山華鴻山詩蕭然有超世出塵之想右丞襄陽歷千載以來風流未沫端賴諸公然世人競賞王李不及高徐本朝惟西樵漁洋二王推賞此種故爲詩直入王孟之室蓋紅豆家法皆在新城故其言如此漁洋論五言詩直以明之高徐上接六朝三唐也雷貫一副憲少從蔡文勤講學乾隆初元直尙書房同事宜黃余棟以父喪歸入臨 皇太子喪 上意欲留之侍讀上疏言余某父喪未葬不宜在皇子左右聞輔臣咎其辭爲好名使在廷人人避好名之嫌不執親喪

非細故也棟由是得歸終制累遷通政使時上以言事者外沽直名自規利便下旨訓飭公謂人臣不惟不可計利并不可好名而朝廷樂聞讜言不必疑其好名并不必疑其好利臺諫所得者名政事所資者實也昔孔子稱舜隱惡揚善則知當舜之時言者亦不能有善而無惡惟舜隱且揚之所以嘉言罔伏遂成執兩用中之治因言宜任老成遠諛佞不爲無事之游幸以增費累不耽無益之玩好以妨幾務其奉使督學出京薦青山人送別舟次薦青守道自重不妄見人惟公能得之嘗爲鵝湖詩說曰朱陸異同聚訟至今始於鵝湖之詩當

日朱子送呂東萊先生至鵝湖東萊約陸子壽子靜二  
先生來會于壽賦詩云孩提知愛長知欽古聖相傳只  
此心大抵有基方築室未聞無阨忽成岑留情傳注翻  
榛塞著意精微轉陸沈珍重友朋勤琢切須知正樂在  
於今孩提知愛稍長知敬此孟子指出人之本心所固  
有使知察識而擴充卽如築室之有基成岑之有阨子  
壽此詩夫何閒然但所以築室成岑正有結構積累之  
功非卽以基爲室以阨爲岑也聖經賢傳辨別是非邪  
正以開牖人心胸正恐鹵莽涉獵不得其精微之意願  
謂傳注可不留情精微可不著意乎當云溺情章句翻

榛塞著意空虛更陸沈則得之子靜和云墟墓興哀宗  
廟欽斯人千古不磨心涓流積至滄溟水卷石崇成泰  
華岑易簡功夫終久大支離事業竟浮沈欲知自下升  
高處真僞先須辨自今子靜此詩首二句卽子壽引孟  
子之意子壽未說及功夫子靜斡旋之故曰涓流卷石  
積至滄溟泰華滄溟不擇細流泰山不辭土壤多識前  
言往行以畜德集義以生浩然之氣正如是也如謂自  
有易簡功夫則孔子好古敏求博學審問慎思明辨篤  
行亦爲多事矣朱子三年後乃和詩以寄懷云德義風  
流夙所欽別離三載更關心偶扶藜杖出寒谷又枉籃

輿度遠岑此追憶當日相會時事也舊學商量加邃密  
新知培養轉深沈此探問別後功夫也因子壽脫離傳  
注子靜自矜易簡恐開蹈空之弊故曰只愁說到無言  
處不信人間有古今厥後朱子荅項平甫書云近世學  
者務返求者以博觀爲外馳務博觀者以內省爲狹隘  
左右佩劍各主一偏而道術分裂不可復合此學者之  
大病又云子靜所說專是尊德性事而某平日所論卻  
是道問學上多了今當反身用力去短集長庶幾不墮  
一偏子靜白鹿洞講義朱子深取之謂其足以發學者  
隱微深痼之病蓋陸先生兄弟之學固不可因鵝湖二

詩定其生平朱子荅呂東萊書云近兩得子壽兄弟書  
卻自訟前見之誤東萊與朱子書云陸子壽前日經過  
留此二十餘日翻然以鵝湖所見爲非又云陸子壽不  
起可痛篤學力行深知舊習之非求益不已朱子祭子  
壽文尤深痛惜謂其降心以從善豈有一豪驕吝之私  
子靜與曹挺之書云學者且當大綱思省平時雖號爲  
士人雖讀聖賢書其實何曾篤志聖賢事業往往從俗  
浮沈與世俯仰徇情縱欲汨沒而不能自振日月逾邁  
而有泯然草木同腐之恥到此能有愧懼大決其志乃  
求涵養磨厲之方若有事役未得讀書未得親師亦可

隨處用力檢點見善則遷有過則改所謂心誠求之不中不遠若事役有暇便可親書冊此段每讀之令人汗下陸先生未嘗教人廢書冊亦卽此可見今之主張陸學者尙曰據依在心豈靠書冊爲有無其弊不至不立語言文字不入禪學不止豈陸先生之教哉卽曰在人情事勢物理上做功夫並非頓悟其不至師心自用臆見自逞者幾希我輩惟在脫去俗學如朱子所謂讀書則實究其理行己則實踐其迹念念向前不輕自恕而已矣其言平實可爲讀書行己之法所著勵志雜錄余已列入留堦叢刻



南阜老人高鳳翰居膠西之三里河工繪事尤長於詩  
寄嘉興鮑西岡明府云水次山樓別後登應憐江上數  
峰青遙知鼓盡湘靈瑟只有隨行老鶴聽元人鄭元祐  
生而右廢旣長工書因自號尙左生南阜刻印用其語  
錢獻之晚得未疾亦以左手作篆

西直門外覺生寺大鐘爲永樂閒造華亭沈度書華嚴  
經鑄於上本貯大內後移漢經厰萬曆五年建萬壽寺  
移懸寺中日俾六僧擊之寺有張江陵所撰碑記天啟  
閒或言寺在帝里白虎分不宜鳴鐘遂不復擊臥置於  
地嘉定張儋伯萬壽寺華嚴鐘歌城西七里前朝寺銅

鐘如山土花漬脣吐三千寶地音背蟠十萬蓮花字九  
重願力超人天點畫波捺何翩翩六丁呵護霄電紫羣  
眞下讀慈雲鮮靖難功多新鬼哭銅山搥破鐘成速龜  
茲樂奏勝幡飄雙樹光涵少師禿鐘高三丈腰圍豐君  
王笑錫公侯封南山伐木枸篋壯照耀慧日何瞳瞳鼎  
湖龍馭排雲上神物淒清墮經廠仙梵禪燈歷九朝特  
勅移來地蕭爽萬牛回首千夫馳華榭巨棟光參差曇  
花感夢聲沈夜銀草搖風曉擊時聖孝原承文母命六  
僧日供齋筵淨雷轟天半紫閣寒潮捲津門塵世醒文  
皇黑業豈能償神廟垂衣祚自長洪鐘靈應迦維力金

地于秋象教彰前年繫馬鍾山下靈谷蒲牢眠斷瓦云  
是高皇東序鏞金川破後無人打雍正十三年改爲覺  
生寺 御製覺生寺大鐘歌并書之勒石於左一時詞  
臣應制賦詩如鄂剛烈沈文懋周石帆均有賡和之作  
錢穉石清明日登鐘樓詩曾家莊靜叩春林永樂鐘洪  
發敬心佛號銑于無隙地 帝歌鏗鎔有元音寶欄十  
二低山翠沙界千秋澹夕陰楊柳遶春成冷節獨於天  
畔數歸禽

全紹衣謂古來受命之主未有如

世祖之仁慈者故臣下多疑以爲佛之後身

謹案 福陵神功聖

德碑 太祖每定一城必諄諄戒殺

聖祖嘗曰朕生平未嘗妄殺一人大哉斯言乃祈天永命之本明思宗碑文出自

世祖御製力言其非亡國之君又爲葬熹宗張皇后竝致祭焉既賜甲申諸忠廟祀各給田七十畝于其家又賜史閣部之母宅廩以終其身嘗有稱故明廢陵者

聖祖斥曰彼身爲天子誰其廢之其平賦篇云昔明增遼餉驟至八百萬未裕邊防反成寇患暫累吾民豈知

滋蔓暫累吾民一年明季練餉詔中語乃有真天子應期而生十三戎

甲所向無堅城曰朕知天意將蘇疲氓

章皇入關授之元輔首收圖籍祛茲疾苦惟正有舊章  
以告太府民惟邦本斯王政之先所以受命夫豈偶然  
本支百世何必更卜年東南重征相承累代史賈以來  
繭絲爲害烈烈

憲皇蠲除清汰世世有仁君以覆我窮黎三江五湖草  
木盡酣嬉前史食貨志似此者希按范文肅本傳師入  
北京收諸曹冊籍布文告給軍需事無巨細咸與議明  
季賦額屢增籍皆燬於寇惟萬歷時故籍存或欲於直  
省求新冊文程不可曰卽此爲額猶恐病民豈可更求  
哉自是天下田賦悉照萬歷年閒例徵民獲蘇息雍正

三年奉旨蠲免蘇州府額徵地丁銀三十萬兩松江府  
十五萬兩從管理戶部事務怡賢親王等所請亦由西  
田相國於康熙季年密爲陳奏早契聖心也謝山 三  
后聖德詩十二篇皆能識其大者選家顧不之及何耶  
徐伯鈺吏部炎嘗選唐宋諸家詩朱子穎贈詩云先生  
閉戶與誰親白首青燈夢古人獨取變風扶正始別裁  
僞體識清真大文糟粕存天地元氣淋漓泣鬼神幾輩  
精誠未磨滅九原心事宛如新禮恭親王嘗師事之誠  
正堂稿讀崑山先生詠物效顰詩書後云西子默不言  
堪配王秋柳嗟此調鼎器蓬廬但拙守

朱涵齋官侍衛時與同官黃丹崖劉蓉洲李文紀張雲

上交誼最篤嘗勸丹崖宜講求經史治術以待大用後

果仕至陝甘總督兼大學士爲時名臣涵齋以副都統

供奉內廷筆墨歷三朝其送丹崖由陝遷兩江云當年

侍從幾同羣十載聞雞志苦辛大樹將軍髯盡白

同輩劉蓉

洲有髯將軍之稱三朝畫史醉爲鄰彈冠共喜君稱最

由滇鎮歸老林下勸學甯忘我亦神聚散如今渾似夢臨歧老眼淚偏眞

子穎送大學士黃丹崖之西軍云殿中舊拜黃金印闔

外新披錦戰袍萬里長城飛露布三邊朔雪洗旌旄黃

河天遠洪濤接青海雲開戍堞高聞道平涼已乘勝天

兵昨夜過臨洮乾隆二十五年西征凱宴

高宗御製詩有獨憶儲胥宣力者凱回未見惜斯人之  
句蓋文襄以前一年卒也

雪橋詩話卷五